



小石山房叢書

1 曾 4
622
7



門 4
語 622
卷 7

松窗快筆
一卷

一卷
松窗快筆

松窗快筆

常熟龔立本淵孟著

偉烈第一

周虎字叔子知和州適金虜入寇虎合戰凡三十有四殺
驍將十數人射死右帥石矧磔虜大創引去由是江淮奠
枕是爲開禧二年也諡忠惠

張炯字鑑翁初依父執朱雲氏偕其子舜民避兵崑山舜
民駕青簾舫以聲樂自隨炯辭曰君方避害不知斂戢禍
及矣抵巴城舜民果被劫窘甚炯載米百石盜遇之人取
石許所餘尙富都以濟朱迨歸酬之笑曰方患難時豈望
報耶不受炯之子修撰洪字宗海本姓侯鞠於炯因冒張



姓戊雲南十有五年立朝三十年東至日本西極洮岷南窮夷緬北盡遼海其生誌自銘曰生與衆人爲伍死與百鬼爲鄰生不能爲聖賢死不能爲星辰隨運化遷與道屈伸涉海洋而不覆犯瘴癘而全身馳遠道而得歸入近班爲侍臣去鄉五十年還家無至親田廬漸開設可以遺子孫含笑入地何慚於人永矢弗諼以志吾墳

吳文恪公訥字敏德永樂間以薦徵至南京館於襄城伯李隆家時羣臣上黃河清頌李屬公爲之首言天地位萬物育仁廟監國問隆曰汝武臣未解此孰所爲耶對曰此臣客吳訥譔也仁廟書訥於屏未幾命教功臣子弟及卽位卽拜監察御史歷陞至副都御史公巡按貴州還有屬

官於僻地追送黃金若干公不啓封題其上曰蕭蕭行李向東還要過前途最險灘若有贓私并土物任教沈在碧波間仁和縣宣聖及七十二子贊宋高宗御製御書其像則李龍眠筆也紹興二十六年十二月刻石太學附以秦檜所記其言曰孔聖以儒道設教弟子皆無邪雜背違於儒道者今縉紳之習或未純乎儒術馳狙詐權譎之說以僥倖於功利其意爲言恢復者發也文恪按浙時歎曰姦穢之名邪妄之語豈可廁於聖賢圖像之後立命磨滅之文恪在國學必寢食廂房一日疾且瀕危子麟倩監官懇請還室文恪厲聲曰風雲氣少兒女情多正統六年辛酉致仕歸環堵蕭然周文襄忱見其窄隘欲爲改創

公曰某不愛華靡勞民傷財適重吾累文襄乃止
徐楨字原芳父彥達徵賦後期法當刑楨年十八請以身
代臨刑詩曰父母恩同日月高願將一死報劬勞三盃白
酒濃如鴉七尺青絲利似刀風送斷魂歸故里月移枯骨
葬荒郊遙知親族偏憐我淚灑西風溼布袍

季壽字景仁洪武二十三年御史藍勝臨縣羅織無辜株
連百餘家壽愍之為詣闕陳狀上別遣張定代為御史而
勝伏誅自是壽足不入城年八十三卒
魚侃字希直永樂二十二年甲辰邢寬榜進士為刑部郎
以清嚴稱漕長舉往清河督運河水淺漲漕舟常梗奏設
淺鋪時加疏濬輸稅者便之撈淺置卒自公始 公守開

封耿介明允似包孝肅母亡家人往訃不敢遽白公覺之
長號竟出不持官府一芥居平三旬九食嘗臥病衾單更
為雨溜沾濕意象慘悽家人溫見呼之曰開封守竟爾耶
公夸然不屑 公生辰客有持酒為壽者厥壻王韶方有
喪以素服往客勸更衣公遙見招之把韶臂詫於眾曰此
真吾壻哉是日飲盡歡

王世貞詩曰魚侯治雄郡貪吏匿洗跡中歲賦歸與妻
子猶菜色雖乖清沁樂終守西山側人事良可悲天心
竟焉極

立本日魚公阡在虞山之陰殘碑蕪沒子每過輒低徊
久之公之勳伐正在我輩心性中彼石槨三年者止堪

眩里兒耳

章珪字孟端舉國初孝廉巡按畿甸奏蠲逋稅六十餘萬
斛正統間與同僚成規糾劾權要罷歸時有周綱者應詔
於京取去國一身輕似葉高名千古重如山與士大夫分
韻送別楊文貞盛怒得楊仲舉解免周雖遠斥而孟端幸
免朋黨之禍 福山東嶽祠塑鄴都獄至猛惡又伏機括
誤躡之則爲羣鬼所搶人非二三伴侶不敢輒入孟端齒
視吳文恪甚少而剛介之氣相類章與吳約以昏夜獨往
每鬼前留一餅爲驗約既定章先往匿帳後吳散餅時每
云與汝一箇次至章匿所伸手叫曰我也要一箇吳徐云
也與汝一箇

錢昕字景寅避之曾孫正統十年乙丑商輅榜進士巡按
浙江時年尙少適勛臣僕陸姓者商於浙怙勢豪橫道路
以目監司而下不敢問錢廉得其罪立逮殺之凡所下車
貪墨斂迹王忠肅公翱嘗歎曰富不愛錢錢昕貧不愛錢
魚侃 江夏吳偉齠時爲景寅家僮侍其子於書齋日取
筆畫山水人物之狀家人曰請答之景寅召試其畫良有
形似乃曰若欲作畫工耶卽與筆札厚給養之弱冠至金
陵遂致盛名卽吳小仙也

徐訥字敏叔長厚有內行躬課臧獲耕耨一夕水漲決防
其僕某起視防缺處以身障之呼衆亟爲修築明日公迎
勞之曰子矢心若是豈久役於人者乎畀田百畝別居不

復待以僕禮 公除夕歸自城舟過港口聞嗚嗚泣聲停舟詢之則居民負人斤金將撤其祖居也公曰吾異若金二十兩償債之餘用以治生民既拜賜因叩姓氏里居公家僅隔十里佯諭之曰吾江陰人也解維亟去 公既多男子一日偶謂周淑人曰今日經某鄉居民皆起視過客惟篋工舟中一女不睥視可異也是時公年老矣淑人以爲公屬意此女陰爲物色致之忽謂公曰舟中人已在此副寢矣公大驚辭不獲已乃強納之生一兒卽侍郎公肅公諱恪俗呼爲徐八都堂也

顧立字成夫由邑掾領簿烏程值閩寇竊發轉餉給三軍屢爲主將設策平盜遷知雲和縣治最陞成都郡守未赴卒 請宦郡丞施某報罷缺道里費公詣之曰子有先人之田數頃公但當寓居敝廬秋斂時當爲公治裝施挈家就之歡然同堂也禾稼旣同公刻期出諭曰如期者蠲租十之二不日租集施遂克歸及公除烏程施已薦補浙憲矣相向感泣公竟不干以私 雲和人有金鐘者當總角時遇公於道旁呼而詢之窶人子也攜入衙齋俾與子姪同業因薦遊黌序復爲之冠婚後金巡按吳中候使事畢躬造其廬公則無祿矣權敘公家如初居旬餘捐俸建祠而去

陳易字一元爲建昌推官地多虎患易移文責土神刻期逐之且焚其穴舉火之夕雪深三尺虎悉遁去後同知楚

黃述職入朝王尙書恕迎謂之曰君非清節著建昌者耶
課最當超遷易以母老乞休王高其志歎息久之
瞿俊字世用成化五年己丑張昇榜進士按察粵東嘗市
帚分給諸僚僚有素乏清譽者倍給之問其故曰君庭多
穢耳僚怒捉硯擲之晏如也公按嶺南薄暮至一公廨
衆稟曰此宅多祟前後使君不居久矣公必欲入是夕燒
燭危坐忽窗外人影紛沓而不聞足音有頃半空聲震勢
若山崩川潰吏卒挽公裾而號久之乃息明發周視院中
獨一榕樹大可數圍公曰是矣入室屏人密草檄出命
官屬集木工一二百輩伐樹衆皆縮手公呼一主簿授檄
令焚之因施斬削自是遂寧公按廣東嘗寢疾臥內堊

壁一堵每夕幻山水圖公心怪之召有司共視居然畫也
塗之以墨隱隱猶見筆跡踰數日始滅公恙尋愈公罷
官家居壁立比舍皆漁戶時時就之席地飲箕踞相爾汝
飲輒歡暢每入郭率候載菱小艇歸仍附之
徐恪字公肅成化二年丙戌羅倫榜進士當慈懿皇太后
崩梓宮神主禘祀中人有異議公給事黃門與僚魏元爭
之哭於庭大學士彭時亦以爲言憲廟嘉納之卒成禮
公布政河南適歲凶省臣欲逐流民防亂公曰是速之也
議停漕粟數萬賑之期以秋熟調補衆擬先聞而後行公
曰民命在旦夕卽有罪請身任之粟遂得發上竟可其奏
公撫汴時值貴璫挾密旨廉訪諸僚爭先趨謁唯公後

往遙望其倨竟不入又議河漲秋巨璫李興張宴意欲據
上座公執主客禮折之興慚服劉都憲大夏預此宴自遜
弗及也陳中丞察請以恭毅易其名不報
褚祚字昌允成化八年壬辰吳寬榜進士知臨海邑有茶
山僧之故業也爲勢豪所占訟久不決一日公閱其牘歎
曰僧今得理矣顧其後有僕在自悔失言立召僧論還其
山且囑之曰汝若賄僕一文卽以山歸豪家矣公清操
絕人爲令時厥弟往省瀕歸無以相遺乃券折祖產授之
後爲御史卒於京師貧不克殮年友吳狀元寬殮之以衾
蔣欽字子脩號自新宏治九年丙辰朱希周榜進士當總
角時每讀史至忠臣烈士傳多欷歔感泣正德元年內寅

冬率南道蔣彥徽等十二人保留台輔劉健謝遷因斥橫
璫高得林馬永成坐逮賜杖明年春宥死落職公獨奏誅
劉瑾瑾矯制加杖候鞠公又從獄中上疏大略言臣有痛
心蹙額之情陛下有覆國亡家之禍請陛下亟殺劉瑾以
謝天下不殺瑾卽先殺臣以謝此賊誓不與逆賊同朝辭
氣剛直權倖切齒復遭嚴刑前後拜廷杖九十越三日殞
於獄初公屬草燈下聞篋篋間鬼聲戢戢因起視曰此疏
一進且撥奇禍鳴者殆先人之靈耶可更厲聲復四震
公歎曰某業已委身義不容緘默負國爲先人羞死則死
耳不可易也及被杖創甚同事者俱迎鑿飲藥公獨云吾
得與龍逢比干遊足矣竟不療治

陳察字原習舉宏治十五年壬戌康海榜進士武廟初義
子江彬驕橫中外仄目公一日遇於朝厲聲咤曰鼠子敢
爾吾今劾汝矣擊之以笏彬不覺短氣公爲御史時劾
劉瑾繫獄罰米及南巡又諫世廟初復建言仕至都御史
撫贛平逆有功公奉命按蜀從郵書中接母訃卽被髮
號泣徒跣馳歸沿途皆進惡草具跋涉間關絕不言憊
錦衣千戶王邦奇以汝革官復巧誣大學士費宏等上敕
廷臣會訊情僞具見顧莫敢奏者科臣楊言獨指邦奇欺
罔上怒其黨庇大臣卽朝中逮繫下獄公向陛大呼曰臣
願以不肖軀易楊言羣僚錯愕引卻上連目懾公公不爲
動言被榜掠公毅然請代每日親餉言於獄獄吏無敢呵

者已又草疏力諍上威稍霽言得外補

孫艾字世節正統辛酉孝廉嘗遊金陵狎客勸攜謝妓公
徧訪教坊季女共得七人持千金納采卽京城卜居七所
每所器皿畢具選日結婚將御一如常儀爭妍競寵備極
燕爾之趣冗費可二萬金興盡而返絕不留盼初公擁
貲百萬以豪侈蕩盡但僦一廬以居雖膏腴輕售終不言
益價一人乃款門自陳愿輸粟五百斛辭曰嘻吾安所得
空屋貯之哉固與之則曰虞山之麓向埋一異石請捐此
米劑剔之鑿山幽峻所稱大石山房是也公中圯時歲
歉枵腹其甥錢偶餽粥一盂會有方士款門公倒屣出迎
囑家人曰分作二盂與客共之公旣以子舟貴封工部

郎嘗步遊金閫有賈人忽把其袖且答且詈幾至折頸公乘間進曰余海虞孫氏非君所憤人也貌或相似耳郡守與舟同榜家僮且欲赴愬賈人惕息公笑曰負恩如某答之最是偶悞何傷怡然引酒酣暢而別

復讎子梅林里人佚其氏父爲倭寇所殺某物色其賊詐投伍中日相近暱坐作不睜已諉之曰某村有治容可御賊熟其款愿信焉怵躍隨往治容實其妻也殺雞呼酒佯爲綢繆某又云恐別有至者爲大王障之執刀立門伺賊醉手刃之

姚志禹居河陽里擇古忠孝節義各一人省貌供奉伏臘獻享治比其鄰必作規勵語萬歷丙申忽詣憲臺檢舉故

御史錢岳穢迹至累數百言按臺曰錢與若何讎曰公惡

難味豈有私愆哉又曰若不顧身耶對曰身復何必顧

當作岱爲秀峯諱也

顧耿光字介明素仗義萬歷二十六年戊戌邑被旱災詔蠲租五萬石故事按畝均派公白段令然曰田有上下蠲十之一卽稔者九矣稔者濫卹則全歉者乃杆償乎須履畝核荒爲便令從其策民賴以甦自是築隄濬渠諸役俱聽公方略令以艱去貽之贖曰國家有不愛財不辭勞不避怨盡如君者何患不指日太平哉 公雖俠烈仗義卻又雅量嘗佇立城隅一夫三批其頰遂馳去公怡然袖手或問何以能堪公曰非意相干方寸亂矣豈直與校不三

日其人暴卒 公以貢租抵潞河會篙師臥病因爲覓藥
有道袍張幕者遙望公來卽言吾鄉侶至矣因迎日子所
須易耳更有秘方子可持以濟人南還後無相忘也叩其
居曰浙之某邑某巷王生藥舖他日如言訪之則王氏故
以仙去者特存一古廟而已公好施藥蓋其遺方云
萬歷三十一年歲癸卯子與公把臂登樓公笑曰日者有
言吾歲在癸卯殆將別知交余恠其語則又曰古誰無死
所遺恨者嘉定友不道侵吾公租二千石委民脂於他邑
吾死誰更索取耶居無何果得訃音亟唁其孤出公治命
則五載前手筆也

附

錢甦傳

邑人龔立本撰

錢甦字更生初諱沂世居常熟之沙盆里天資沈毅遭高
皇帝神聖以布衣出入闕廷蓋異數云初與豪右朱元善
有郟被誣繫獄當洪武己酉御鞫午門甦獲昭雪尋奉口
詔俾所過州縣南向上坐宣諭天子更化之旨此四月三
日也帝憐其夜行賜宿儀鸞司其明日發自京都始道句
容令禮之至丹陽丹陽令遇之甚隆而密奏其事上報曰
朕命也于是官吏望風震恐以是月望歸休矣居無幾元
善多方營賄則又文致甦如前會甦子迪慷慨伸訴事亦
旋釋十年秋星變應詔疏請辨華夸均田產慎刑罰尙廉
恥復古學造人材上嘉納之敕辦事中書省復上寶封三

事明年六月元幼主卒上命禮部會撰祭文甦從旁窺之
不甚愜竊擬三百餘言大約以華夸偏正立論部僚弗省
也甦因以獻帝置諸袖中特詔用之召見曰錢甦比者何
在對曰臣校簿後湖上悟曰宰相憾爾耶先是甦應詔詣
中書長揖不拜謂未拜天子而先拜丞相於禮不合其剛
直如此上累欲官之輒以疾辭年六十終於家甦學識淹
博其河圖詠云一二三四各方列六七八九外與俱五象
夾十同中居或實或虛符洛書嘗推本太極二五多所發
明著述澹佚惜哉甦之父希祖元季教諭玉山厥後多聞
人迪與所皆其著者

立本日予讀郡邑志及明典諸逸史得更生事未嘗不

嚮往之歷年未久紀載且覺舛誤予覈錢氏家乘兼咨
父老爰立傳而採像贊附焉贊乃吳文恪公手筆也
贊曰學博而專志高而毅陋辭章而弗居藐豪強而弗避
斯實吾鄉前輩之偉人其視今之小黠大痴蠅營勢利者
豈可同年而語也耶

黃鉞傳 邑人楊儀撰

黃鉞字叔揚蘇郡常熟人少明敏好學家無藏書鉞日遊
市肆中見書不問古今卽借觀之或竟日不還是時天下
新定重法繩下士不樂仕人文散逸詔求賢才悉集京師
鉞父見其子好學甚恐爲郡縣所知數懲之不能止家有
田數十畝在葛澤陂因令督畊其中鉞至陂無書讀托市

鹽酪率一二日卽入城從其友人家借得道中披覽至陂
輒盡每以爲恨楊潞者元末隱士也嘗避雨泊舟鉞舍旁
窺見鉞持書倚簷讀不輟聲乃就視之曰豎子好學至此
哉日能讀幾何答曰苦無書讀耳過目可不忘也潞曰吾
有書在海洋店去此不遠子能從遊乎鉞喜再拜卽從潞
入舟至其舍與數冊去自是數數來易潞怪其頻舉所借
書問之悉記憶無遺者潞喜曰插架書不下數萬卷不能
舉付汝汝當就吾舍讀因令其子福同室而居者三年遂
盡其書縣聞之併辟福賢良潞怨之曰吾不幸遭世亂家
破族散今獨攜一子畊讀遠郊畢餘生以子好學盡以藏
書奉觀覽奈何不自韜晦卒爲人所知貽累我家鉞徐曰

第無患當爲公說尹罷之乃教福結束如農夫且曰卽尹
有問子但操吳音勿有所對福盡如鉞教因同詣尹曰鉞
與福同筆硯數載知福爲深其材能學問並出鉞下而福
父老身病不可遣行卽行不足以應詔君且得罪尹心知
其詐也不得已乃獨遣鉞以生員除宜章典史洪武三十
二年己卯舉湖廣鄉試明年庚辰第進士授刑科給事中
陞戶科左又改禮科居職封駁甚多辛巳卽建文三年以父喪
歸其所厚翰林侍讀方孝儒弔之屏左右密言曰北方不
靖蘇常鎮三府京師之左輔應天之右臂也君吳人朝廷
之近臣今雖去當有以教我鉞曰三郡惟鎮江最爲要害
守非其人是自撤其藩籬也童俊狡獪不宜獨任吾近見

其奏事上前視遠而言游此其心不可測也蘇州知府姚善字克一忠義激烈有國士風似能獨當一面但仁慈有餘而御下太寬此治郡之良才恐不足於定亂耳然國家大勢不在江南必待戎馬至此始行布置亦已晚矣孝儒然之乃因鉞附書於善以忠孝相勉期戮力王室以濟時艱善得書與鉞相對慟哭以死自誓鉞至家因父殯在陂上舊廬卽往居之足跡不入城邑有御史按部至常熟問曰此間有黃給事何在邑中無知其家者一老人居與鉞鄰知之引御史舟至陂時方暮秋收禾堆積邨巷路又泥淖御史乃徒步抵其舍鉞從幕中對語移日家人以貴客至欲割雞具饌鉞驚曰豈有居喪而殺雞禮客者耶卒以菜

粥對食而別壬午靖難師日促姚善受建文君詔總率蘇松常鎮嘉興五郡兵馬勤王善以書招鉞鉞以親喪尙在殯請卽日營畢葬事乃可趨命旣而童俊果以鎮江降文皇帝正位詔暴姚善罪狀收之善麾下百戶許某性權詐因得親善縛善邀賞鉞聞之慟哭遂絕食閉目三日四死悉以家人救免或傳言善已款服上赦其罪復瞠目曰吾知善爲人決無二心吾且少俟之善事定吾獨死未晚也脫果不死吾將下報希直希直者孝儒字也遂稍稍食其年七月十日善就刑報至鉞起登琴川橋西向再拜祀之而哭曰吾與君相期不幸有國難義同許身君與希直旣已同死國吾忍背義獨生乎祀畢給家人歸祭具遂從容

整衣冠奮身入水死時收善黨急軍士縱橫郡邑中且訛言將錄鉞家親族悉驚伏無問及鉞屍者福乃具棺衾夜泣橋側百方求其屍不能得更數日屍忽自出立水中福慟哭親抱而起易其衣體猶不潰敗竟成禮葬之復弔以詩曰江風夜夜鼓洪波江雨朝朝濕薜蘿九辯不回哀郢志三軍難奪採薇歌手披宿草孤蹤滿夢轉空梁月影多誰謂百年臣子恨獨聞野老淚滂沱

贊曰叔揚克一之死均之爲忠然克一受命于君舉義師不能成功卒爲麾下所縛身死族夸此君子之所優爲也若叔揚之死則屢絕而復食忍須臾以待克一之事定然後從容以成其義孝不遺其親忠不後其君信不忘其友

而又不紓以苟生不激以蔓禍其賢於人遠矣哉

王鳳洲黃給事詩云叔揚踐華省食貧無異操奮爲墨
縑舉匪以弓旌招借箸盡勤王沈淵報久要身泯神自

王松柏蒼然喬

勳澤第二

何公子牙廬江灣人也元嘉末除海虞令祿俸盡以供母
母喪去官哀毀踰禮敦厲名行學堅義明

立本日名宦首祀此公可謂卓絕

郭縣丞三益字慎求海鹽人元祐三年進士常平使者嘗
調蘇湖常秀之民濬青龍江畫地程役而郭所部前期告
辦使者議留常熟助別州竣事郭引所部歸使者怒檄追

孔亟郭母周曰事出無名使者再思行悔矣雖然汝不可
無會第無以所部從也無何使者果止丞勿來
立本曰爾時佐貳有志節如此厥母亦明哲哉
王縣公燾字重潛一字伯晦紹興新昌人嘉定十三年進
士端平元年知常熟事百廢具興以政最累遷龍圖學士
清脩剛勁賈似道歸天台葬母寄徑新昌燾獨不謁見
高縣公瑞洪武中涖任嘗著敝袴隸人戈孟遠竊見之納
絹二疋於其衙公諭而鞭之加絹於項斥出縣門其自吟
有賄賂一分無地入清廉兩字有天知之句
楊公用字子器後以字行復字名父慈谿人宏治間涖事
教民築隄捍水召流亡復業田稔而後稅之先是折糧銀

隨糧同辦每苦銀貴米賤公諭糧戶以米貿易春半而輸
輸銀近在堂廉監收不敢橫索 公始涖邑卽召呈胥圖
所居方向籍書事產丁力審役日按籍參之遂多平允
公後參議湖廣時分守辰常值彬桂賊起人人首鼠公則
請攻彬桂冒暑平賊尋遷河南參政會疾作歎曰吾意在
解組但河南寇患繹騷豈臣子圖安時耶卽日抵汴城賊
且走湖廣河洛以爲安枕公曰彼中土兵追迫必復還汝
州爲洛陽藩籬賊所必趨乃兼程赴汝公方食而賊果犯
境矣投筇登城手書信牌示城中曰不上城者斬竭力固
守汝遂克全 汝虞邑鄉賢之裔有妻非其耦者公取嫁先
賢後人躬臨其婚

立本日公以文學飾吏治有古循良風課最召入吏部
其後陳中丞察欲諡公敏憲其疏畧曰已故布政使楊
子器歷中外因事建議互終始持已克堅決疑金井特
立孝廟之終長跽禁門甘繫武皇之始其亦槩見矣
計縣公宗道字惟中廣西柳州馬平人當歲凶嘗與郡守
林世遠議水災林有難色公曰令誠非才安敢忽民命而
迎合太守意農方耒耜而官府橫征使之失業而轉死非
特令之罪也林雖不懌卒從之公每以政暇登臨名勝
集詞人觴詠桑民憚任誕食貧公在任授粲解衣率以爲
常

任光祿名環字應乾潞安人始爲郡丞職專防海會島夷

寇吳累建方略尋擢參政兵備江南體貌不甚魁梧而臨
事嚴翼遇物愷悌一時倚爲慈父予邑王令缺死賴公駐
節邑中撫綏安輯士庶得以無恐其篇章激烈予猶及記
一絕乃在虞時作也其詩曰昔年跨馬陰山道今日提兵
滄海涯三尺龍泉書萬卷丈夫何處不爲家 初島夷犯
黃江涇橫殺行戮唐會元順之登臺說周御史曰公見良
民被刃耶周言須任使君來有頃公至語次啜茶大嚼茶
椀云某誓殲此賊是夜出師斬首五六百級蓋南中首捷
也公每視事母病報至輒仰天大慟聞者遽爲酸鼻嘉靖
三十八年己未科臣徐師簡疏請贈光祿卿廕一子千戶
列祀名宦祠

黃縣公嘉賓己未進士閩之崇安人也窮簷疾苦無所不
悉嘉靖庚辛間當兵荒之後四境蕭然諸臺督賦甚急公
教民勿亟且曰令寧死必不寘民于溝壑也輸賦者布縷
雞豚皆以便宜收納父老至今感歎撫字心勞其公之謂
哉 海寇吳宗結黨劫掠公微服親行設策擒獲鹽使袁
某雅道宗賄至是爲之居間公不聽立撲殺之遂爲袁所
中量轉戶曹郎病卒京邸年未逮四十 公丰姿韶秀聰
穎絕倫直指使者頻委公查核各郡軒車所至人望爲神
明發奸摘伏興利除害職雖邑令其所加惠遠矣

附

李壯士名安廣西人從主簿李宗昭寓官廨嘉靖癸丑倭

虜初犯福山港壯士持短兵毒弩往觀遇虜於尙墅里虜
僅數人蓋渠魁之騁望者壯士一箭斃其前鋒又手刃其
三矢足坎中被害十月十八日也是歲虜大創引去有司
殮其屍禮葬山原開一穴乃得成壙似默佑云邵北虞先
生輓之以詩其略曰留威江邑烽長偃埋骨山原草不枯
防海將軍印如斗也應投槊愧非夫又當時傳一對聯云
五月城成空譚氏十年之粟譚照譚曉輪
金四萬築城三朝寇退賴李
安一箭之功

立本日壯士於吾邑有捍患功歲時致祀不絕有以也
王縣公死事業有專祀藉令壯士附饗不愈於野祭哉
惜未有建此議者

名蹟第三

瞿礪先生墓在直塘廣安寺側居民浚塘得其誌石云瞿

礪先生字磻子廣川人隱居不仕後徙常熟卒葬東陵武

邱寺重崗之原武邱蓋廣安舊額也按晉書先生不知何許人太和末常居宣

城郡界山有瞿礪因以為名太司馬桓溫見先生披鹿裘坐于石室神無忤色

吳縣張旭字伯高一字季明初為邑尉有老人陳牒求判

越宿又來旭怒其煩老人曰觀公筆奇妙欲以藏家耳旭

因問所藏盡出其父書旭視之天下奇筆也自是盡其法

立本曰老人父書法若此竟晦其名不愧處士矣

錢朝散觀復字知原由政和進士出判衢州虜騎犯江浙

衢當衝要觀復先白郡守悉縱老弱戶留一丁既而衆兵

欲造變顧城中無所掠乃止公知廣德軍其民苦轉餉

回遠加斂水腳因請於朝寄廩湖之四安至國門纔五百

資減大半命旭請日出光華照四式

邱光祿礪字師說秦檜當國以礪同年生有孫欲娶其女

礪托以兄姊未葬請祠甚力實以疏檜云

瞿中翰汝文字公巽在試院以冗官發策一夜僅成四句

云太平日久人樂仕進可為朝廷慶者一可為朝廷慮者

二在翰苑時禁中新創儼儀有旨令撰文辰送篇目午夜

督索進呈立就數篇文法高古紹興初以參知政事卒門

人謚為忠惠先生公巽善畫有佛道像六十餘軸及楚

天春曉圖傳世

曾少保懷字欽道宋孝宗時專戶部凡五年未嘗語錢穀而會計甚密上目爲蕭何劉晏面賜御書松賦以示歲寒之意淳熙元由里中起拜右丞相力疾赴闕上特製輕金帶以贈

趙待制公豫字仲欽幼年聰警默誦左氏傳不訛一字由紹興進士官至寶謨閣待制沈厚清苦居官廉正嘗曰吾求爲循吏不求爲健吏

施監察顯字孟微洪武丁卯戊辰鄉會試俱第一爲庶吉士累遷監察御史一日上命賦詩有日出光華照四方之句遂以疑似得罪放歸道中有詩云蹇驢駝病出京華細策鳴鞭數落花借問呢喃雙燕子隔江楊柳是誰家

立本日太祖以曾出家詩中有犯光字和字釋字者爲譏訕俱得罪至于誅殺公之被譴亦以光字故然止於放歸幸矣

陸參政杲字孟昭景泰二年柯潛榜進士任刑部郎尋陞福建參政繕城築隄頗著威惠不喜談生產而所至必蒔花竹小飾齋廊戒內子儲名醞珍錯客過必酣暢小夜不休一時之稱俠有度者必歸杲也

王世貞贊曰達埒王孫不顯已俠同孟公不踰軌安得其人與終始

顧參政以山字安道由吏員登順天鄉薦天順中以侍御外補節概清嚴其罷宦也饗殮唯麥粥而已

楊知州集字浩然景泰五年甲戌孫賢榜進士初觀政兵部卽移書于忠肅謙略曰姦人黃竑進易儲之說以迎合上意本爲脫身計耳公等國家柱石乃戀宮僚之賞而不思所以善後乎脫章綸鍾同二人死於杖下而公等坐享崇高奈清議何謙以書示王文文曰書生不知朝廷法度然有膽氣當進一級處之遂出爲安州知州進士除知州自集始

李文安公傑字世賢成化二年丙戌羅倫榜進士當成化間充兩朝東宮講官眷遇特隆武廟初賜公雕玉麒麟帶逆瑾先期附報意以市權公正色曰此君恩耳瑾知不可動遂思中之公請致仕公林居旣久一夕繞庭徬徨行

夫人問故答曰彗星未滅所以憂惶也

王參政鼎字元勳成化五年己亥張昇榜進士雅篤友誼蕭山何舜賓與公善舜賓以南臺坐註論戍留家與邑令鄒魯有怨魯陰狠人也械舜賓赴戍因間道害之舜賓且死囑其子競曰兒誠不共戴天則年友王某可托也競亡命歸鼎鼎設館授粲但難之曰事何容易夜分就寢鼎鼎從戶外呼競名競輒應如是者幾二十年夜不交睫鼎鼎乃嘆曰子可以報仇矣然未有子少待之競旣得子會魯陞僉事去任公資競千金而陰爲決策競乃邀魯於江泝毒毆之灌以溷穢不令死獨瞎其雙目憲司驗魯旣瞽廢而心頗憐競爲父發憤競母又得公貲之京擿登聞鼓訟寃

事下并鞫大理評事曹恕引唐梁悅事爲證競得減死天下稱競之孝而高公之義競之子名王孫示不忘王也終邑諸生

王副使舜漁字于澤正德十二年丁丑施芬榜進士公嘗同浙江中貴畢真鎮浙將應宸濠之叛御史張公縉察公忠略密謀爲備一日真召兩公飲欲戕之座上公請先入以辨挫其氣而約張先出真謀遂不得行 公素諸武備分巡東寧時邊牆多圯公白撫臣修築虜不敢犯或挾中貴擅支諸衛俸給公捕置於法及其遷也遼人泣送有圖其像而去者

周參政木字近仁成化十一年乙未謝遷榜進士當謝政

北歸巨艦蕭然僅舁一頑石置舟中石今在墓頭長可丈餘公參政浙藩時特修岳武穆墓復其墓田因鑄秦檜夫婦鐵像北面跪武穆供遊人笞撻至今爲士論所快

立本曰予謁岳墓首肯鑄像事未究所從始也公之族子齊金爲予道之

徐迪功禎卿字昌谷世居梅李鎮少從邵守齋先生受業年十七撰新倩籍居然晉魏矣弱冠著談藝錄及歎歎集北地李夢陽傾蓋語曰談藝超駕六朝而歎歎集氣格不類公大悟沈思三十三旦暮若與漢魏諸賢晤對其後詞調高雅杰然名家書學亦工借世罕爲之傳耳 逆瑾當國輒以虐刑煅煉朝士公爲大理寺副多所平反又作猛

虎行相請遂得罪罰俸請改國子博士

立本日世之習昌谷者率稱吳郡子能私一文人哉聞

秀卿二科志黃魯曾故實補遺兩君皆郡人可以徵矣

又崑山顧文康公鼎臣嘗夢至一官廨見刑犯纍纍

徐昌谷在其內驚問之則曰此非君所知也其後世廟

出狩文康扈從不勝勞頓一夕夢遊西山殊自怡適會

有傳呵聲至前驅所執多屬清玩不類宰官旌節主者

綠袍跨鹿卽昌谷也云將往青城山赴任所掌仙班錄

籍詰以前事云此另有故所以不煩公援手爲事必欲

白耳

吳少卿堂字士升宏治十二年己未倫文敘榜進士正德

七年河朔大盜劉七作亂海內騷動上命陸總憲完統兵

勦賊公以御史監軍後發總憲三日德州千戶李某護其

軍行及曹州望見大營以爲王旅逼之則劉賊也時已薄

暮李直突營前呼曰吾陸爺差來打話官也營中一人躍

馬而前李射殺之後出者披靡矣度公抵州李亦馳去官

兵鏖戰斬首八百獲俘一百七十有脅從官屬逮獄公奏

釋之脫諸三木引酒酬勸計自飲百四十觥人人感激圖

報數日後臨陣七人死事身負十餘創者甚衆賊退三舍

拔營赴江南是時完逗留濟寧公欲論劾之始進狼山之

捷蓋公力也

盧方伯翊字鳳翀宏治三年庚戌錢福榜進士初知獲嘉

御史李瀚行縣不復問吏事但歎息者久之士全蜀以松
潘爲障蔽成卒從成都調遣勞逸不均公常守禦松潘與
撫臣裁定更成法小河抵棧閣運道久廢公調工治之士
人稱盧崖閣公敦歷中外於川廣雲貴持重有恩信多安
攘功不特一蜀也
王觀察宗錫字元善成化十七年辛丑王華榜進士初按
江右浮梁人有與臺長締姻者豪橫不法公捕訊治如律
比還朝造臺謝過臺長曰此吾所以舉子也士論兩賢之
季徵君儒字席珍浮沈巽宮退然若不勝衣獨究心民瘼
張都憲鳳翔縣儒以災傷建言都憲稍稍引卻儒升堂挽
裾請畢其說左右懼然危之儒自若也令有酷於催科者

歲甚歉儒與辨於郡守前令頰頰詆爲狂生守曰真志士
哉明日召而慰之

立本日子錄季子事幾停筆恐諸生得以口實云

嚴文靖公訥字敏卿嘉靖二十年辛丑沈坤榜進士當秉
銓時委政於選部陸光祖拱手受成天下稱服公平居嘗
曰吾被主上厚恩自覺銓選一節未嘗負國 又爾時海
忠介公爲淳安令以失上官意與下考入京聽調適白簡
論覲吏動耗千金淳安令海瑞往返止用銀三十兩彼獨
何人而能若是公見之驚喜卽日超擢戶部主政忠介因
此得上疏極諫云

陳莊靖公瓚字廷禛嘉靖三十五年丙辰諸大綬榜進士

風格豪爽間與才俊戲演傳奇釋禍除永豐令吏卒迎候者見公頂進賢冠擊壺高歌私心以爲易與比蒞事威稜峭肅乃大駭服公居諫垣一朝彈去兩太史瞿文懿景淳在史局戲謂曰我詞林從不落人喙公乃破此例耶公曰重詞林故去其相玷者

王世貞贊曰直而溫溫而柔介于石不終日表裏如一始終如一

邵文遠先生圭潔字伯如先生究心經濟不克表見時時與當事計民瘼其水火災徭築城議皆爲邑令所採登薦十餘年僅山田五十畝歲得餘菽不能餬其口公才氣雄贍雖浮沈青袍而英聲蔚起嘗於計偕舟次四方文士

麟集隔浦會呼北虞先生北虞公別號也鄰舟問之莫不推蓬翹首其見重如此公以子璠貴贈文林郎又三十年門人追諡文遠先生
趙文毅公用賢字汝師隆慶五年辛未張元忭榜進士自疏論江陵中外敬憚比召復原官再上封事極言東南賦役之艱因爲區畫鑿鑿中窾留中不報陳莊靖鑄其諫草每向當事者稱歎公與陸莊簡光祖同時是時吳縣太倉方柄國陸多所迎合公輒面罵之陸笑曰此老趙不濟處亦是好處其後陸爲冢宰公乃得再召公文章矯健王元美相與揚扝所著續五子篇公其一也
劉知州竑字以規成化元年乙酉孝廉知縉雲事俗黠號

難治尤勇於私鬪至殺傷遂逸不肯就吏公故緩之使出
輕重論無脫者有婦戕夫不承爲默念之若有告者一訊
而得人驚爲神版所載田上下胥舞文亂之公奮爲稽覈
賦因以定穴得產銀爭所由興而吏因濟其墨公爲請罷
其課考最移知定州州俗勁悍能柔之以文教武吏恣橫
公取其卒繩之法惴不敢動

斲弛第四

李璋吳中有故相遠派嘗遊一菴院題壁云大丞相再從
姪某嘗遊璋署其旁曰混元皇帝三十七代孫李璋繼至
璋行第九初赴省試特奏語同試者曰廷唱日必不以名
見呼止稱我排第耳衆不信與之約璋密進狀云日在京

師有遠族相遇名却犯重欲以玖易之他日殿下果唱李
玖矣王荆公甚愛其才有送行詩云湖海聲名二十年尙
隨鄉試已華顛卻歸甫里無三徑擬傍胥山就一廛朱轂
風塵休帳望青鞋雲水且留連故人相見如相問爲道方
尋木雁篇璋之孫益字彥中歷官至監察御史

黃公望字子久初應神童科慧聲藉藉曾辟浙司椽吏一
日幅巾鶴氅白事憲長怪之俄而飄然鴻冥實郭西十里
外故有石梁面山阻湖子久偃卧梁上時時發狂叫絕引
酒痛飲飲罷投囊于川川流幾爲之闕善畫山水自署曰
大癡道人

陳眉公太平清話曰黃公望本常熟人陸神童

之弟出繼永嘉黃氏故姓黃
湯瑛字魯寶天順元年丁丑黎澗榜進士剛果寡諧由刑

部郎至廉憲所善里儒陳表每赴之必褫中服豪飲以詩相角邑有貲郎素強橫羣守繩之且爲所嚙而去臻當刑部時嘗邀表飲室中其人適具腆儀通謁公使人辭之隔屏語曰彼腴弱民膏血以自雄常時不相識今乃刑部主事來手表起掩其口不止

桑悅字民懌總角補博士弟子員部使者按水利下邑悅前謁之書刺江南才子桑悅士不當用刺又厚自譽使者大駭約明日相延悅比往刺又署天下才人矣使者俾校書而預刊落以試悅索筆請膽無誤使者乃大服悅通判長沙職領糧事先是豪滑乾沒積逋常三十餘萬逮繫滿獄悅悉心經理逋賦頓入居平頗以賈長沙自日被抑

潦倒作吊湘壘賦以見志悅再試禮部主司奇其文及閱道統論至曰夫子傳之我縮舌棄去抑調泰和邑博爲博士歲餘按察視學者別上尚書濬濬曰吾故人桑悅幸毋以屬吏視也按察行部抵邑不見悅顧問長吏曰悅豈有恙乎吏素甚悅皆曰無恙自負不肯迎耳乃使吏召之悅曰連宵且雨霽傳舍圯守妻子毋暇何候若爲按察待久更兩吏促之悅益怒曰若真無耳者卽按察力能屈博士可屈桑先生乎爲若期三日先生來不三日先生不來矣越三日詣按察長揖立不跪按察屬聲曰博士分不當跪耶悅前日漢汲長孺揖大將軍明公貴豈踰大將軍而長孺固無賢於悅奈何以面目相恐天下士哉悅今去天

下自謂明公不容悅耳脫帽徑出按察無奈已乃下留之
民憚狂士也却有數語遠駕晉人曰天聰無耳天明無目
區區恃一耳目之聰明而欲成參贊之功真揭竿下海而
求唐口者矣又曰喜怒之情生于天之六氣喜生譽怒生
毀乃行天之氣初不爲我而設民憚方提抱時堂中懸
軸輒指其字逮能言誥之乃曰吾所指者皆膺書也晚歲
彙全稿付御史某鏤版某渡江覆舟竟不傳今所刻者其
剩業耳

瞿景字炳陽性度坦率嗜酒落魄自號醉漁喜畫蘆燕逼
真劉儼字以則父儼當周侍郎忱理賦江南募用有幹略
者

邑令郭南白見劉儼等數人侍郎寓鶴山書院儼等入輒
至榻前敘話後儼任父事倍有襟度儼於父歿後走幣
四方乞詩文未愜其意會故人陳生修輓章來有兩京冠
蓋知名久百室饑寒感惠多之句儼乃撫几稱快蟬聯十
日起視陳生舟曰是不勝載以家航載米百石贈之甘
澤宰邑時有二舉子至邑其鄉人也假舍僧房令性暴僧
不敢白濡遲久之乃以語儼時天寒儼爲治裘絮昇薪米
酒肴積庭中客驚喜過望居數日爲二客置酒私讓同儕
曰令有客使飢寒於吾土地邑真無人乎共資其喪二百
金遣之竟不以聞於令令亦終不知也陽山花某

吳中故實

作陽山 豪侈自負多方致儼儼往見其門繫畊牛數十頭

笑曰此賣牛牙郎家耶不交禮竟歸

狄雲漢字天章成化甲午孝廉除沅江令郊外有佳山水
公暇每攜妻子共遊遊必暮歸民間父子挈果茗相候公
停輿享之童豎爲扶輿而行沅江故多湖寇終公之任不
敢犯後宦途多崎挂冠臥虞山薄田二十五畝在湖壩因
戲稱餘夫與太倉州守李端善嘗共登城眺詠其詩有云
南去好山都入越東來滄海半吞吳李指之曰先生語工
若是信坐窮也

楊儀字夢羽嘉靖五年丙戌龔用卿榜進士罷宦構萬卷
樓兩楹擁圖書自娛以迹及公庭爲恥其初歸詞曰萬卷
樓前百花徑裏年來草色荒蕪天涯客子歸夢久模糊猿

鷓鴣猜已甚故山遂千里歸途念少日煙霞色相落魄帶

經鋤 人生何自苦風波險惡歲月奔徂笑候門稚子驚

問征夫惟有下機山婦應私訝貧似當初覽囊中虎符龍

敕猶恐事虛無右調滿庭芳元本無煩草嘲多亦不妨花前

縱飲任清狂舊恨莫思量右調巫山一段雲世廟無逸殿成春

日宴廷臣於殿中伶人歌花底黃鸝之詞上問此詞何名

伶人曰花柳分春之曲上喜曰甚似今日風景顧謂夏相

國言曰花柳分春無逸殿可就席思一對聯來夏私遣飛

騎訪尋楊祠部令對楊方與僚友羣會一勛戚家重門深

院杯酌正濃忽聞騎吏叩門聲急闈人拒之曰夏公所特

遣也旣入門卽問楊祠部何在屏客出片紙授楊卽上所

命七字句也座客皆停杯失色儼衣冠以俟命楊就庭中立取紙筆屬對付使者其句云華夷一統大明朝使者即飛騎馳去客既復坐相顧不敢請問楊亦不敢言由是人疑夏公與楊有密謀多忌之事聞於外時霍侍郎署印吏部夜與顧鼎臣黃宗明謝丕三侍郎作會席中曰吾欲將吏部二人外補顧問何人霍曰陳主客簾楊祠祭儀也顧抗聲曰陳郎中可陞楊員外不可陞霍愕然曰陞遷者吏部之職其權在我何故楊員外不可陞顧笑曰鼎鑪尚有耳豈不聞楊員外是桂翁左右手乎安可外補黃正色曰宗明幸而同省知之甚真楊乃桂翁文字友安得謂左右手乎次日報出楊陞四川僉事陳陞岳州知府其夜二鼓

夏從門隙投疏留陳楊二人次日辰刻旨遂下御筆親批云部中既多事楊儀又係見差著留京辦事我朝吏部陞官無天子留之之例天下傳聞以爲異事

孫七政字齊之性好客然所居池館非同調弗得入有僮父突過池上遺溺亟呼田父攜桔槔引去池水水且涸矣猶汲井泉滌之公故有臺榭一旦緩急捐去獨忍死衛古松三株其詩云鄰家割宅供婚嫁荒徑留松待故人汪司馬戚少保常過訪借酒家趨入蓋門亦在所割中也柚字禹錫公之姪也虞山西麓有一邱一壑藤蘿蔽芾柚顧而樂之結廬開徑冗費不貲一時文人名姬無不知藤溪者每過從輒傾尊恐後林端揭一酒旆署曰賣漿家

呈令王之翰墨吏也伐虞山古松供爨柚詣松徑悲號酬酒作詩弔之曰礪畔疎疎度好音翛然常伴白雲林孤標自失驚龍勢獨客無聞駐鶴音雪滿寒山虛榻影月明清夜伴琴心經行若問銷魂處碧蘚寒深久廢吟

周詩字以言原籍崑山厥父右愛吾邑山水謂所善孫世節可屬命詩移家來詩詞調高雅壯歲好登臨遊燕越間多交名流人人恨相見晚在吳郡獨與皇甫兄弟莫逆卒葬虞山皇甫沖銘墓楊用修慎跋其稿曰海內詩社神交老友以言嘗注內經十餘卷曰軒岐之秘盡此矣散遺不傳其方藥神效張仲景而下不能過然所得稍贏百金輒與知交飲酒高會放情湖山遇人卽賑其急金盡乃已

已後理方藥率爲常以言弔岳忠武云將軍埋骨處過客式英雄北伐生前烈南枝死後忠山河戎馬異涕淚古今同淒斷封頭草蒼蒼落照中浙江學憲孔天允見而賞之命駕唱酬懽然平生

劉鳳贊曰詩之稱於時由子安然其人曠以疎行己有恥特誕迂類可笑至不肯見人或聞其名造之多避去與彼自炫者異矣士之貴名豈其爲利今乃以無行爲放達寄請爲通俠嚮之所羞居之不疑悲夫

徐洪字彥宏邑富民也家累百萬一日忽諭司記僕潘珪曰吾家業盛矣必有代謝今將舍此而去之盡舉田產授珪挈妻子築室先隴之側布衣蔬食謝遠交遊自號桃源

小隱

衲羽第五

彥稱卽四高僧中伏虎禪師居破山一虎詣之口中被箭因爲拔去明日獵夫朱德循血蹤覓虎彥稱示之以矢朱感悟罷獵

張道裕龍虎山人天監中棲遁虞山白日仙去迨宋治平中道士李則正浚其丹井得石函啓之藏丹二丸化雙紅鴿飛入尙湖則正道行高雅好施藥多奇效

了通住智林寺嗜酒不檢通州狼山寺失火衆見一僧從烈焰中嚙酒滅火自稱智林了通翌日衆渡江叩謝了通正沈醉力辭無之然衣裾猶有焦灼處其後沐浴頓化

申元道師事徐神翁將南遊翁戒之曰逢虞則止遇雪則開元道謹受教渡江偶居虞山插竹結菴竹遂成林峻嶺無所得水一日雪深數尺惟菴前覆簣地不積元道頓悟鑿井及泉名雪井其後相傳仙去

宋晤恩年十三聞誦彌陀經遂求出家終日一食臥必左臂坐必踣跌每布薩涕泗不止雍熙二年八月朔夜觀白光自井而出謂鄉人曰吾將逝矣絕粒禁言夢一沙門執金爐焚香三繞其室夢覺猶聞異香二十五日說止觀指歸及觀心義畢端坐而化人間管絃鈴鐸之音自西漸去宋梅汝南仕至縣令有志淨業忽夢僧授紙百幅鑿破爲二八字以問東靈恕師曰二八十六也豈十六觀經之謂

乎適一僧授之以經忽不見由此自名往生後因邑中生
公造丈六彌陀像乃施財百萬爲楹飾殿前池中遂湧一
雙頭白蓮其花百葉是冬無疾而終

周隆孫真人住持普福宮嘗遊武當舟次儀真風逆舟中
恐真人畫一符於帆檣舟叢中獨乘風迅利

金洲字子虛別號默齋才藻慧秀嘗至一處桃花夾溪其
兩楹揭紅日半梁僧寺晚白雲千古洞門秋之句自後忽
忽厭世吟桃花詩百篇棄家赴終南後有人見之於三茅
山年百有四

席應珍少爲老氏學異衣冠走山澤間有所訪求盡通符
籙經法亦涉獵詩傳其事母至孝哭泣之哀有踰常度或

以太上忘情諷之則曰天下豈有不孝神仙哉

按恭靖姚少師初爲

道士嘗師

事應珍云

篤古第六

余之先敦禮公景才五世同居雍雍禮法麟惠九年旌表
門閭至宋嘉祐中少述公侔幼孤力學孝行篤至郡守唐
詢奏於朝詔給粟帛

朱良吉延祐乙卯冬良吉母錢氏病且死良吉禱天取心
肉一盪煮粥食母母愈良吉心痛不可起邑人俞浩齋過
視其胷瘡裂五寸氣騰痛莫能言俞爲納其心以桑白皮
線縫合月餘愈

陳符字原錫少從吳山吳文度先生學先生物無子符臨

其喪盡哀葬之如禮養文度之妻以壽終歲時祭掃凡五十年

陳壽字仲器別號忘山父母繼歿前後廬墓六年目失明一夕夢白衣人治之既寤雙瞳豁然時有僧見白龍旋繞其墓木

瞿興嗣字華卿母嘗夏月患癰穢不可近華卿燂湯洗滌跣床下驅蚊又母思芟食時芟始花華卿解衣入水歷覆其葉覓之自午達酉雙脛皆赤腫俄得三芟以獻蓋孝感云 擅工王氏貧且病華卿以雞鳴詣其門投二千緡於窗隙竟去有告糴者鶉衣百結華卿受其值五千乃問曰吾性善忘若欲糴十千耶遂佯授之洪武初擢禮部員外

郎子莊以薦參政福建

李栗字翼寬天順末栗貢成均適西蜀大使陳清坐辟厥子寵年十有四奏代父死繫獄栗出金三百餘兩濟之清父子因得恩宥清尋陞簿崑山攜季女贈栗栗曰公乃以我爲非夫也顧有因財而獲人之女者耶堅卻不納廣徵詩文以揚寵之孝

呂謙訓徒營生年踰四十其妻贈淑人不育一日從邨塾中負錢布若干以歸會有人推仆曠野持錢布趨去越二三載其人款門謝曰某無狀往歲劫公爾時官逋剝膚賴公財免於法謹倍息以償謙不受更善遣之其人復攜季女至曰公長者豈容千秋爲餒鬼哉吾有女禮得備箕帚

矣謙固卻不可因撫爲己女擇良士歸焉歸之夕而贈淑
人有娠產方伯公函謙亦累贈廉憲
胡墳字伯章以孝義聞每月日蝕必率子婦具香燭肅拜
於庭復明乃止 邑有一人失其氏當英廟北狩時此人
每五更起誦佛經誦畢北向再拜因號泣曰天乎天乎誰
教汝去至車駕南還方輟誦

邵相字文吉初從里師受業聞古人嘉言善行津津嚮往
嘗涅孝弟二字於左臂已又刻孝弟忠信禮義廉恥八字
懸於胷臆時纔八九齡耳 黃給諫死靖難事人未有識
其墓者一日公於草萊中訪得之題碑以志其處又憫公
無嗣有族人在田間徒步數十里外相尋時鄉賢子姓多

行齋乃得嗣其人貧聞客至匿弗肯出慰之乃出因烹伏
雞作飭以餉然公竟忍飢以歸 公雖布衣而邑令楊子
器時時造公訪民間疾苦已欲委公以賑飢事而難言公
心知之曰此吾事也家省戶察見民釜中多蘼蕪捧之以
泣所賑全活人甚衆 有寡婦家貧守志公聞之往拜且
泣曰餓死事極小汝勉之卽養殮有不繼某雖貧當分半
菽以給汝

立本日余受知於公之孫昌鉏字畊夫者昌鉏深心篤
行有祖風間爲余言公遺命母入鄉賢祠噫此可觀鄉
賢矣

徐駿少時蓄鴿父撻之遂篤志力學後父亡遇鴿飛鳴必

思親訓涕泣不已人稱泣鴿先生

松窗快筆

遺失

... 立本固全受... 夫善昌... 心...
... 夫善昌... 心...
... 夫善昌... 心...

松窗快筆終

海虞畫苑 略一卷

海虞畫苑略序

海虞畫苑略

海虞畫苑略序

古之士逃名於山谷以筆墨爲性命今之士求名於要津以筆墨爲贅疣何相戾之遠也蓋樂乎此者乃能忘乎彼而慕乎外者必至遺其內矣僚之凡秋之奕尙樂之終身不厭况縱筆潑墨機與神遇興會所至造物爭奇如僧繇畫龍道子畫佛彼且以導引性情長永歲年而肯慕乎外耶吾邑山水之秀甲於中吳靈氣所鍾蔚生人材仕爲名臣者無論矣其碩隱鳴高寄閒情於繪事雖不過英華外見之餘而技臻獨絕要有不可沒者天池山人魚君振南負才而隱於市廛性喜畫善鑒別古蹟真贋構小樓一楹藏古今人畫頗夥皆精與楊西亭馬棲霞素善二君之畫

尤多苟非樂乎此而深信篤好焉能致是今出其所輯海
虞畫苑略見示益徵其篤志好古縵長汲深先哲風微指
掌可觀裨益後學之耳目良非淺尠惟是吾虞山水之秀
不滅於古昔而筆墨擅長者遠不逮曩時豈賦稟之有殊
耶抑外慕者多而逃名者尠也魚君望古選集手泐是編
以闡揚前烈之盛心寓慨歎末俗之微旨其用意遠矣同
里寒青居士許行健譔

虞山僻在海濱而詩畫之盛甲於江左顧詩自錢馮以前
未見有卓然成家爲當世所宗者而畫則有元四大家中
推黃子久爲冠自此俠轂而起世不乏人蓋畫之開其端
也實先於詩三百年必清煦榮濫觴獨早此其所以尤盛

耳同里魚翁天池以廉吏子孫而脩行立名不墜家風生
平無他嗜好唯以畫自娛所居臨街小樓收藏古今名跡
甚夥俗子請觀者輒拔梯不令上有吾子行之風暇日集
邑中善畫者自子久以下共得若干人人撰小傳以識其
凡名曰海虞畫苑略鑒賞精敘次核品題當蓋櫟園讀畫
錄之匹也書未告竣而翁卽世令子虞巖續成之雖小小
撰述而亦姚氏之有思廉焉洵可謂善繼志者矣余近者
亦有海虞詩苑之輯意存矜慎非確然可傳者不輕入也
而魚氏之書則以發潛闡幽爲主故筆墨粗具便得載入
其用意良厚有非余所及者抑余嘗病吾邑之詩好盡好
纖而未臻絕詣會爲今侍郎長洲沈公言之公深歎爲知

言及觀吾邑之畫往往能濃而不能淡能密而不能疎能近而不能遠其坐病正與詩等豈其地之山水秀麗攢簇無虛無飄渺之觀無空濛歷落之趣故發爲圖繪亦囿於風氣耶然蕭疎如漁山淡遠如尊古已能自闢畦徑而能脫去吾邑故習矣獨詩歌一道未見有能自樹立破錢馮兩家之範圍而進於雋永超絕者故因序畫苑而牽連及之亦庸以致望於後來之秀云爾時乾隆戊辰秋八月柳南居士王應奎拜手題

古人畫各有淵源如禪家之分南北宗衣鉢授受不相淆亂非此則爲旁門外道直野狐耳以余所見顧長康女史箴圖祇畫人物不布景長康楷書箴於圖上宋思陵御書

馬和之畫幽風圖倣此王摩詰雪霽捕魚圖峯巒但勾輪廓不皴染今畫家凡雪景層皴疊染款必落仿右丞筆至李營邱畫世藏者僅讀碑圖一軸裨中書李成畫山水王曉畫人物兩行十字近畫家動輒書摹李營邱法豈知當米海嶽時已有無李論行世拍壘導簪可笑也余往在郡城畔煙老人過余寓齋同憩閒顧翁與樂全吳翁講論法書名畫種種眞蹟鑒賞收藏家流傳寶玩如渴思飲如飢思食或餅金懸購或巧取豪奪究之興衰不定聚散靡常俯仰今昔諸老停盃放筯不禁感慨係之矣天池魚翁依櫟園周司農畫人傳例著海虞畫苑略示余余故述所見所聞書之卷末若夫恐藝苑之湮晦表前賢於汗簡則寒

青先生與翁自敘言之詳矣余又何多焉同里恕醉弟孫
翼飛識

海虞畫苑略自序

余性鄙樸無所好而獨好畫邑中若石谷西亭名重天下
漁山棲霞卓絕一時固素所景仰其餘各擅所長者指不
勝屈暇日過從流連茶話閒觀其解衣盤礴落筆點染意
愜飛運往往爲之叫絕歲月逝矣追念少時游好多爲異
物觸目有山陽之感故稍詮次其梗概以誌不忘自元以
來名家輩出取冠首簡以識典型遊寓方外閨秀均各附
見噫海疆僻地翰墨如林鍾毓才華蔚乎盛矣但恐見聞
不廣在前代不無遺漏卽

本朝亦搜羅未盡故僅稱海虞畫苑略云

乾隆十年乙丑春三月天池山人魚翼識於閒止樓時年

七十有一

不風在雨力不無散計自

長製新機紛紛辭墨使林建德木華氣平溫定於恐良用
各各案輩出阻原首備以精典聖機寓衣衣開表以各附
神機自育山制之風特辨精爽其殊辨以請不立自元
神派故封封為之四條意只世矣設念少和流後定為異
類報則一敬符就散其信出備其派本盤解香華黑菜
香山詩題岸辦一初因表規其和其備各對想是香韻不
餘神爾神賦賦而爾賦盡出中芬不谷西亭各重天不
或更言散烈自序

海虞畫苑略總目

元七人 附見一人

明六十一人 附見十三人

國朝一百五十二人 附見二十一人

遊寓

明七人 附見一人

國朝六人 附見一人

方外

國朝十人

閨秀

明二人

國朝六十四人

較書

國朝一人

衣

國朝六人

國朝八人

國朝

國朝一百五十二人

國朝六十一人

國朝八人

國朝

海虞畫苑略姓氏目

元七人 附見一人

黃公望

謝伯成

謝庭芝

湯有吉

明六十一人 附見十三人

顧 罔

陳 珪

金 黼

盧景春

王 珪

繆 佚

張彥材 子子明

張宏儒

張 緒

朱 琪 子佐 侃

范 禮

姓氏目

姓目

蔣宥

瞿杲

錢祖

蕭完

周庸

陸履謙

張翬

王鳳

孫艾

鄧黻

子廷薦

陸文

錢仁夫

陳宴

王舜畊

郁勛

錢復

桑琳

秦澄

張端

顧叔潤

李傑

桑榮

楊廷端

朱士謙

沈某

吳麟

繆元吉

龔力本

李子安

子奎

孫躍

嚴訥

王伯臣

子載仕

孫贊

周之冕

陸昞

趙固

葛澣

蘇先

瞿汝臣

陳某

沈春澤

戈汕

王維烈

張季

子儒

張維

徐崧

陸瑞徵

王訪

趙欽

姓目

二

瞿式耒

王復昌

戴

王錫綬

嚴 栻

姪某

陳煌圖

張繼儒

顧 言

沈 崙

國朝五十八人 附見二十人

何 適

溫裕

陳 帆

侯 服

孫冕

錢朝鼎

陳 岷

孫繼謨

邱 園

姪松

張敏政

霍山

吳 歷

許 山

子嶠

永

張延年

汪 儒

子泗

維

馬 眉

子元馭

楊 翥

徐 甡

顧文淵

徐 稷

王 翬

子疇

徐 蘭

余 珣

周 愷

汪 淇

黃 彭

子達

逸

徐 方

子鎮

張道浚

盧 沅

尤 存

沈 和

張 珂

子晞

王譽昌

楊 岫

黃向堅

馮行貞

蔡遠

胡峻

楊晉

張遠

彭睿

柯琬

祝芑

唐袞

子伸 俊

榮林

姚匡

徐新

王烈

子峻

許從龍

蔣廷錫

姪國延

江聲

錢良

黃鼎

錢希仲

鄒元斗

袁溥

子椿

吳山

沈峯

張景

高培

譚嶸

戴樸

游寓十人 附見二人

明七人

吳偉

李流芳

朱治憫

程嘉燧

宋珏

歸昌世

子莊

吳拭

國朝三人

顧原

汪痴

李櫟

劉某

方外五人

國朝

釋雪坡

釋岳

釋恆

釋古

釋照

閏秀

明二人

王塚

翁儒安

國朝五人

瞿觀至

陳璘

吳綯

吳筠

盧璘

較書

國朝

文英

海虞畫苑略

樗叟魚翼輯

元

黃公望字子久號大痴又號一峯老人家於小山下後游
西湖愛其山水遂結廬笱箕泉晚入富春山年八十六
乃終公望天資孤朗博極羣書畫軼關仝為有元四大
家之冠嘗於月夜棹孤舟出西郭門循山而行山盡抵
湖橋以長繩繫酒餅於船尾返舟行至齊女墓下牽繩
取餅繩斷撫掌大笑聲振山谷人望之以為神仙云
王珪字君璋博覽載籍好鼓琴善畫嘗以異材辟辭不赴
得凝神養氣之術注道德經撰養生還原奧旨等集築

室虞麓曰中陽丹房因號中陽老人晚年辟穀壽九十餘

謝伯成筆法俊逸得北苑遺則楊廉夫嘗爲題瀑布圖極嘆賞之

繆佚字叔明能詩善畫嘗寫林塘圖倪雲林楊廉夫輩並題詠焉

謝庭芝字仲和號雪村家任陽工詩善書畫山水竹石並臻神妙

張彥材工寫照嘗與楊鐵厓遊子子明字蘭雪號大頑老痴又號雪山道人畫山水能世家學永樂中詔至京名播公卿間

湯有吉工寫生

明

顧困字子困至正末嘗爲海道萬戶洪武初遁跡北山以繪事自娛每見佳山水及奇樹怪石輒注目凝神興至縱筆曲盡其變初師董源後出入諸家尤工設色號半痴老人

張宏儒工畫馬法趙松雪

陳珪字伯圭號蒼莽元大孫不希仕進好畫山水得二米法頗自矜貴不輕與人嘗曰畫者無聲詩也寫白家意思而已居邑之河西子允文字永文號寶齋有隱操亦善寫生

張緒字廷瑞姿容豐秀居鄉校有才名膺薦爲會昌侯府
教授畫竹匹夏太常

盧景春字以和號燕居清脩遠俗居城西繞屋種梅以林
道自况善寫翎毛梅竹尤佳

金黼字用文自號竹泉生嗜吟咏善畫山水而梅蘭竹石
更有幽致

朱琪字孟祺號拙菴居士山水兼諸家所長子佐字廷輔
次子侃字廷直精人物佐子蒙亦以畫名

范禮字宗嗣工畫山水私淑馬遠

蔣宥字朝恩儀觀清雅善畫人物時推高品巡撫朱瑄薦
入京館閣鉅公皆延致之有詔圖御容羣薦宥宥以草

野辭焉

翟杲字炳陽世居五渠性坦率嗜酒落拓自號醉魚工畫

花鳥於蘆雁稱神品錢祖蕭完皆其入室弟子

周庸字叔常善畫山水工吟咏

陸履謙字道卿精繪事山水尤佳

張翬字文翥山水宗夏馬年九十二猶揮灑不倦李夢陽

題其畫云張翬有名成化間大塗小抹成山水樹石燥

硬筆意古往往人間落片紙

王鳳字舜儀學畫於蔣供奉畫得其秘

孫艾字世節號西川風流儒雅以任俠聞父官吏部累賞

鉅萬西川周人急揮斥殆盡畫師石田翁嘗爲翁寫照

翁自題有瘦影任君描寫去百年草木要相思之句與
文徵仲吳原博皇甫子循兄弟輩友善晚以子貴封繕
部郎

鄧黻字文度號梓堂正德丁卯舉人通經博古詩文之外
兼工山水頗秀潤年八十八而卒子廷薦字臺山善承
家學

陸文字汝學性不耐俗聞叩門聲輒逸竹林中善飲醉則
拈小詩寫意有閑居一絕云薜蘿垂蔓柳垂絲長日陰
陰午色遲叮囑小童休報事先生堂上看陶詩可想見
其風致矣畫師石田翁得淋漓澹宕之趣

錢仁夫字士宏號東湖宏治己丑進士任都水主事逆瑾

專政遽引疾歸放情詩酒尤工山水竹石性好客名流
如沈石田俞民度輩時往來其家著作甚富納其稿於
生壙中名曰詩冢卒年八十五

陳寰字原習號琴溪正德辛未進士選庶吉士入翰林丰
神秀朗彈琴作畫觸手便工又善大書會母譚淑人喪
寰自繪其像兄察時典蜀奔歸望而號拜曰我母儼在
也寰後遷南京國子祭酒致仕

王舜耕字子田與弟舜漁同榜進士歷仕御史巡理鹺政
暇則從事筆墨工寫山水蒼老挺拔仿米尤為神似李
文安傑有題舜耕畫七古為王太守屬其詩曰遠山蒼
蒼近山綠山下溪流浸寒玉煙景溟濛畫不開一片丹

青園霧縠連岡杳杳接孤村芳樹依依帶平麓石厓路
斷小橋通高隱誰知結茆屋居人鮮少游人稀頗覺幽
深類盤谷王谷筆跡誰能如位置彷彿高尙書想當盤
礴恣揮灑胸次直與造化俱江南風景奇絕地隨手寫
入生絹圖東萊太守好事者珍重何啻同珊瑚黃堂政
暇時一覽恍若置身山水區我家舊在吳中住採山釣
水都成趣玉堂十載受君恩未許翩然拂衣去松風蘿
月久無緣布襪青鞋空有具還君此圖三嘆吁興在雲
山最深處

郁勛字元績宏治丙辰進士知華容縣工畫花鳥何市管
氏藏有勛寫歲寒圖挂幅老梅寒雀佐以小仙山茶筆

致秀發絕類周少谷而丰神較勝

錢復五渠人清逸不羈畫師董源入能品亦善書

桑琳字廷貴宗道孫居穿山履行任真博涉文史畫筆清
美著有蔗卿雜詠鶴溪集

秦澄字叔裕任都察院照磨陞紹興府經歷善畫

張端字廷端號肯堂官中書舍人善寫竹石山水平遠有
逸致

顧叔澗能詩畫山水宗盛子昭

李傑字世賢石城里人少凝重長就學日記千言年十七
領鄉薦成化丙戌進士官至禮部尙書拂劉瑾意致仕
歸卒加贈太子太保諡文安詩文清簡畫筆適逸書法

米黃初號雪樵又曰石城居士

桑榮字文耀邑諸生玘之子性嗜竹時畫竹以抒情有詩

曰竹窗集

楊廷端數試於鄉不利壯游京師一時若孫太傅袁錦衣輩慕其才藝爭迎致之每酒酣輒寫竹石

朱士謙畫人物設色佳妙

沈某字蘆洲居沈浜工畫山水與石田友善其筆致亦酷似石田

吳麟字瑞卿性溫慎善清言工花卉遊石田翁之門宏治丙辰春麟寫牡丹于妙智菴翁賦詩紀事雨晴風晴日杲杲趁此看花花更好澆紅要畫三百觴請客不須辭

量小野僧裁蒼要客到急掃風軒破清曉知渠色相本來空未必直成被花惱吳生又與花傳神紙上生涯春不老青春展卷無時無姚家魏家何足道又云瑞卿能染折枝如活興發造此老人惜春之懷劇于少壯不覺其媿媿也

繆元吉字伯旋邑諸生瞿文懿門人精繪事年逾九十猶能點染云

龔力本工傳神

李子安善寫真子文奎奎子躍能世其業嚴訥字敏卿號養齋以宰輔乞養歸里優游林泉者廿餘年游戲繪事寫花卉有奇致卒諡文靖

王伯臣字鑑如號劍池花鳥師崔子西寫意尤勝子載仕
字浮玉號鼎卿邑諸生隱居白茆凡山水人物花卉俱
擅名與嚴道時投契最密酬借無虛日晚年結茆桃源
澗左

周之冕字服卿號少谷居東徐市後寓郡中寫意花卉最
有神韻設色亦鮮雅家畜諸禽詳其飲啄飛止故動筆
具有生意王弇州嘗論其畫云寫花卉者無如吳郡吳
郡自沈啓南之後有陳道復陸叔平然道復妙而不真
叔平真而不妙之冕能兼二子之長
陸昞字華甫居畢澤因號畢淵生少從文待詔游書畫得
其逸意

趙固字某某以丹青供奉內庭萬歷八年神宗召張居正
張元忬等示宣廟所繪元兔圖令賦詩進御書名於軸
并許得用圖記特召固摹副本勒石

葛澣字天民汝寧太守孫也承藉貴顯家有園亭花木之
勝與沈兩若徐于王比鄰而居流連文酒沈徐皆與錢
宗伯厚惟天民未嘗一至其門人尤重其品畫宗董巨
沈曜樵亟稱之

蘇先字子後號墨莊少以新柳詩見賞於錢宗伯工畫仕
女為時所重

瞿汝臣號古村畫學右丞

陳某字畹公居芝川善畫蘭

沈春澤字雨若號竹逸參政令吾孫也工詩善畫蘭竹近
松雪一派

戈汕字莊樂號豈弁能詩工篆籀畫石紋松針皴染細密
无院史習

王維烈字无競少遊周少谷之門畫得其法筆致似更蒼

拙

張季字季奇奇之言畸蓋自以爲畸人云一目恆睨視嘖
笑舉止間俱有畫思早年筆秀潤可喜已乃出入宋元
名家及吳中先輩益變而蒼老微遠性散誕好從走馬
蹴鞠之徒游富貴好事者招延第以冷語雜調使人倒
座更强之作繪事掉頭去矣惟遇佳山水會心觀場興

至然後舐墨伸紙疎疎點染生動淋漓自不可及若伺
其突煙不舉風雨僵臥持杖頭往而要焉則長縑短幅
各厭所求是其最得意筆也苟餅有儲粟畫义有贏錢
輒又傲兀不爲應矣以故手蹟流傳絕少人亦莫得而
贖之或日斷炊以所畫淵明像典於魏孝廉叔子叔子
賦詩遺之云先生寧以飢乞食不肯折腰換五斗豈知
遺照能救飢乞米無門典五柳四壁兼挂无絃琴把菊
東籬誰載酒無酒何以供先生坐令見笑中空負少別
終當置酒招勸影揮杯還和否於萬歷庚戌年卒年四
十有一子一名儒字師雅邑諸生亦工人物

張維字叔維季奇弟少跳盪不羈愛暱狎客一旦折節閉

戶飭脩於是第五之名奕然畫苑矣尤耽爲詩清新秀
逸顧崎刻自好願爲古人重根本父母兄嫂四棺纍纍
拮据營葬撫姪儒不啻父師所爲詩酒社皆單寒孤露
士一與交不喜近富貴人稍意輕悻然現面卽有故知
間爲道地勸遊賢士大夫闈所如輒左平生寓跡半在
西湖退則歸於虎邱所至香燈藥爐之側手一編自哦
好招集四明勝侶結客伸歡忘其身之爲貧旅也筆墨
造請填案塞几疲日夜之心力以應之坐是日疴削崇
禎改元歲始卜城隅一椽置酒高會喟然曰何日得竭
吾柔翰償此宿逋將息影終老於此迨庚午年五十徧
索同人詩曰及今贈我勝於他日哭我也時猶未病人

皆避其言而傷之至秋客歸果卒得年止此魏仲雪論
贊曰蔚矣二張歷落嶸崎一狂一狷庶幾近之夙世詞
客前身畫師攸萃一門煙霧結姿

徐峽字石臣號長卿性孤介善書畫工山水筆致蒼澗
陸瑞徵字兆登韻州守化淳子性好讀書兼通繪事所居
頤志堂有柳塘花塢之勝與兄九來時集名流觴詠人
故以二陸稱之以明經選江寧學博後知浙之新城
王訪字啓道鼎之子性行端和好畫山水與趙欽敬夫爲
遊侶欽亦善畫妙有文辭

瞿式耒字起周文懿孫留守公從弟精於繪事寸縑尺素
人盡珍之性慧巧善治屋宇初入其室蕭然四壁牀側

度下忽啓一戶則巖壑窈窕竹木菁蔥入其中者咫尺猶迷客至每流連詩酒終日不倦後任涪州同知卒於官署

王復高字孚美花卉翎毛刻畫入細
錢某字壽甫或云名希之工詩善畫僧宗乘有壽甫桃源新居詩云寂寂閒原上幽居面草萊石佳新洗出樹好遠尋栽畫就將詩證謀身以道裁過從應未識籬戶不多開

王錫綬字分符號養虛工山水人物筆意粗拙另具一種別致

嚴杕字子張晚號髻珠頭陀文靖公孫第進士官職方郎

有文武才畫山水儻然出塵姪某字起商善畫松蒼鱗古幹恍若紙上風濤奔撼也

陳煌圖字鴻文中崇禎壬午副榜授南京翰林院待詔入國朝徵山林隱逸以親老不赴工詩善篆隸間作山水墨梅亦逸品也

張繼儒工畫山水筆墨蒼潤峯巒秀峭鹿阿孫氏藏有巨幅濃皴細染疊壑層厓氣韻藹郁款誌古虞張某本里中張氏舊物嘗典質庫主人欲爲乾沒幾構訟孫氏以廿金歸之云

顧言字行素善畫菜非其人不應也或日斷炊乃持幾紙質米稍盈卽取歸有富家子以多金購之堅卻不與或

海虞畫苑略
詢故曰彼素不識此今耳食我畫耶自重如此

沈崙字子山寫山水具蒼潤古雅之致復工詩畫矜貴不

苟作傳世絕少楊穀園贈詩有得君一筆畫掃我十年

愁句九言詩嘗與贊軍主人游

國朝

何適字達生號白石道人居芝川顏其齋曰陶菴少從嘉

定李長蘅遊盡傳其法獨以畫蘭名于時寫乾蕊枯葉

入妙品門人溫裕字子裕迹荒村以筆墨自娛所寫

蘭竹瘦勁如之宋熊字兆吉亦得其法

陳帆字際園號南浦性狷潔篤學好修山水師梅道人與

詩書稱三絕山水畫然出畫我某字歐南善畫然其

侯服字伯陽工畫蘆雁孫冕字服周亦工花鳥兼善寫真

錢朝鼎字禹九號黍谷歷官中丞畫蘭以森發勝人謂白

石山林黍谷臺閣畫亦如其人也

陳岷字山民程孟陽高足也工畫蕭蕭數筆殊有遠韻作

寫意人物不施眉目而意態天然善鼓琴得虞山正派

間爲小詩亦有別趣

孫繼謨字君承邑諸生善畫竹住映雪山居亭園林之樂

方塘曲沼有喜聞堂京對齋西爽樓諸勝

邱園字嶼雪東海侯岳之後居烏邱山因號烏邱山人縱

情詩酒尤善度曲撰蜀鵲啼歲寒松雙鳧影諸傳奇有

元人風度所寫山水潑墨濃重別自成家從子崧字廣

成工詩亦善畫蘭

吳歷字漁山文恪公裔孫所居有子游墨井遂自號墨井道人清潔自好不諧於世彈琴詠詩蕭然高寄尤工繪事王奉常錢宗伯亟稱之同時王石谷聲名滿天下持縑幣而請者日塞其門而漁山踰伏海上不屑屑爭名然其山水樹石荒遠蕭散氣韻高邁實埒於石谷云廣東職方郎程周量有題漁山畫早雪圖歌漁山山人不出山場來燕市仍鍵關含毫潑墨自怡悅爲我披豁開心顏鷺溪一幅營邱似積素凝寒半江水殘條拂地凍欲僵有客孤舟去如駛蘆荻蕭蕭風亂飛千山寒色兼斜暉此翁掉頭頗解事天地已閑人當歸不然訪戴意

亦適歲寒蘭芷應須惜多謝山人冰雪心挂帆好向羅浮宅

許山字山如號青浮兵部員外宸章子不求宦達甘貧苦吟詩畫秋蟲病蜨落雁寒蟬以寄其蕭瑟之致子岫永岫字暘谷後改名徹號蒯莽善吟咏豐腴工穩似續丁卯畫梅法逃禪老人永字南交號在野亦工詩善寫生色澤鮮妍神彩飛動得徐黃遺意

張延年字長齡建寧太守孫善寫翎毛花木尤工美人汪儒字慎爲休寧籍僑居邑之北郭吟咏外兼工濡染寫古松特妙性豪善飲醉輒縱筆揮灑淋漓滿紙年八十三卒子泗維泗字姬水維字虎溪善承家學杜門卻掃

有父風

馬肩字子白號雪漁善寫花鳥尤工蘆雁子元馭字扶義號棲霞又號天虞山人畫傳家學而氣韻超逸突過乃父賦性落拓縱酒逞筆乃益豪放醒則自以爲神略爲點染特開生面

楊翥字丹山工寫仙佛

徐姓字行來號林邱又曰偶生形癯而短長於書法尤善山水其松石野仙更爲擅勝嘗繪城隍廟兩壁龍虎極其雄偉年八十有三

顧文淵字湘原號雪坡又號海粟居士清脩絕俗詩有海粟集善書畫尤以墨竹擅名蕭疎簡逸對之可以滌塵

澣俗嘗作小幅見賒題詩云畫思原來觸處生一林寫出若天成試於葉上潛心聽可似蕭蕭作雨聲其風致可想見云

徐稷字稼臣號稔齋書妙四體能詩善畫山水人物氣韻高邁巨幅長卷才力有餘卽袖珍小冊具咫尺千里之勢惜不永其年

王翬字石谷號耕煙散人生時墨香滿室三日不散長好畫山水王廉州員照見而奇之石谷遂師事焉復從太常煙客游太常精繪事收藏名跡甲于吳郡盡出而令其揣摩於是洗髓伐毛鉤深致遠擷唐宋之菁英漱元明之芳潤卓然獨絕遂集大成晚年徵繪南巡圖稱

海虞書苑
三
旨欲官之辭不受退居里門四方走金幣求者屢滿戶
外壽至八十六而終次子太學生疇字壽田號留畊山
水師趙大年一派亦佳

徐爾字芬若號芝仙學詩於王司寇阮亭阮亭極稱之采
其詩入居易錄精於繪事花卉實可繼惲南田其白描
人物幾於李龍眠復生矣芬若自少遊京師數十年僅
一歸展墓故邑中罕有知之者

余珣字恂若號荆山善寫生梅雀草蟲韻致靈動蓋師卽
度餘而別自成家者

周愷字長康號雪航工寫人物尤精仕女有態濃意遠之
致

汪淇字竹里又號白嶽山人工詩善書兼精繪事寫山水
布置疎密瀟灑出塵

黃彭字堯臣號麓隱山水花鳥筆致秀發伯子達字石儔
號鶴峯工詩揮灑花鳥尤長水墨點染晚年潛心內典
人以老佛稱之季子逸字菊存亦善繪事客山右卒
徐方字允平號鐵山又曰亦舟善畫馬筆致磊落骨肉停
勻蔣文肅詩云畫馬獨數東城徐其見賞如此子鎮字
元鼎亦工此技

張道浚字庭仙工書善琴尤精畫竹極蕭疎清遠之致有
崔還堂詩鈔

虞沅字澣之工花鳥賦色鮮麗兼有丰韻

尤存字古存少時與單曾傳同爲浮屠邵無盡惜其英秀
勸令歸儒曾傳愛琴後竟以琴著古存愛畫而名不甚
顯然筆墨清潤非俗工可及

沈穉字石民工書畫篆刻亞於文三橋僑居吳門廷尉李
公煦延致幕下值

聖祖南巡凡榜額畫卷皆出其手並邀 御覽名著一時

張珂字玉可號岫雪工山水層巒壁高樹深林自出新
意子晞字東扶號雪帆善承家學弱歲宗石田翁往往
作贗本人莫能辨後師事畊煙歸於細膩一派孫韶亦
能畫

王譽昌字露潛號話山邑諸生蚤棄舉子業一意於詩遂

以詩名家間畫山水其臨摹名蹟往往入神曾借耕煙
畫摹之歸以僞本畊煙莫之辨然頗自矜流傳甚夥

楊岫字方生居周涇口杜門自好不妄交接獨與顧雪坡
相與合寫山水清真秀拔幽深渾厚無一點塵俗氣

黃向堅字端木工山水蒼老秀潤嫻有古法父孔昭明末
遠宦大姚兵戈阻絕流寓白鹽井向堅攜一囊一蓋備
歷艱苦迎歸侍養三十餘年卒嘗以身所經窮溪斷壑
豺虎蠻箐悉繪圖以誌

馮行貞字服之號白菴鈍吟先生次子膂力絕人狀貌如
河朔儉父善擊劍攢槩投石挽強嘗從康親王南征有
軍功當得官貧不克就選遂策蹇歸里以筆硯餬口喜

海虞畫苑略
畫
吟詩善書法工摹古印尤精繪事其松石純用水墨皴
染文秀絕倫居徐偶生之上

蔡遠字自遠號天涯閩人僑居我邑又曰紫帽山人誌不
忘故邱也學畫於耕煙得其指授筆勢淋漓然一樹一
石必有所本惟落拓不羈往往使酒罵座竟貧老不遇
以沒

楊晉字子鶴號西亭爲畊煙高弟長洲宋侍郎堅齋太倉
王相國顓荈奉 詔繪南巡圖並徵子鶴遂偕其師入
都共事三年圖成入御名達

九重堅齋請 內府所藏唐宋元明諸名家真蹟倩子鶴
摹副本進御幾欲亂真而四方士大夫持縑幣求者無

虛日子鶴隨意酬應略無難色以故人人得其歡心子
鶴之畫骨秀天成山水人物翎毛花卉俱臻古人闡奧
而其畫牛蹄角生動不減韓太沖戴惟高也後生末學
沾丐餘潤以贖筆求款欣然拂素其通懷樂易如此晚
號鶴道人自繪絳帕蒙頭小照蓋以胎仙自况云壽八
十有五無疾而逝如委蛻焉長君亭宇雲房紹述家學
工書能畫嘗侍京邸得入太學先子鶴卒

張遠字超然號無悶道人侯官人占籍常熟書法瘦勁詩
筆清矯其點染水墨松枝梅蕊自有逸致脩髯偉幹狀
貌如羽人劍客領解閩闈文名益著遨遊四方所至傾
其賢豪長者晚年宰滇之祿豐卒於官

彭睿字白如號雲史善山水居三涇距塢邱山僅一里時
與邱嶼雪游筆法細潤清逸與嶼雪迥異

柯琬字素臣芝川人善寫人物筆致娟秀

祝芑字孫貽又曰嘯峯工寫出獵圖寸人豆馬至其鑿控
縱送飛鷹繫犬曲盡神致

唐袞字山補號萍鄉善畫蘭竹仲子仲字鳳逸號愛廬諸
生能詩善書亦工畫蘭落筆如飛縱橫中幽致停妥叔
子俊字石耕工山水始師蔡天涯後盡脫其窠曰超軼
秀拔其卷子以袖珍小冊邱壑空雲摹仿舊跡无失準
繩直可接武西亭

榮林字上谷號西園居南村山水得畊煙傳

姚匡字石村山水師耕煙行筆簡易風神高古後遊京師
徵入畫院海寧查學士聲山極稱之

徐新字南村工寫真不問妍媸老幼靡不神肖呼之欲出
洵爲能事

王烈字揚武號以齋工畫人物無師資授筆致超詣子峻
字崇瞻號墨圃傳神無不酷肖其人物小至寸人豆馬
大而尋丈徑尺不用稿本鑿空運意懸腕疾揮無不準
規合度停當盡態惜年止四十四而卒
許從龍字佐王嘉善人山水花鳥得法宋元尤工仙釋神
奇異狀形匠心而出不資粉本自成一家初以當事薦
入南薰殿繼而需次府通判適康熙丙戌會試遵

旨許捐職現在謁選者以外簾効用故得充膳錄官向無
此例亦異數也後挈家來處居迎春門外卒年八十有
二葬西郊烏目墩右從子國延字某克繼其學佐王曾
為金方伯繪五百阿羅漢裝二百軸歸南昌棲賢寺
蔣廷錫字揚孫號西谷未第時與馬棲霞顧雪坡遊游戲
翰墨天資高邁落筆超然絕俗既貴顯矜重不苟作今
所傳長卷大軸皆贗本也雍正戊申入相卒謚文肅
江聲字飛濤號白沙工詩善寫竹與雪坡友善頗得其傳
性嗜書得秘本輒手錄丹黃燦然校勘精確年五十而
卒予獨記其臨終一絕云四十年間愁裏過從今忽地
頓開鎖撒手懸厓去不回本來面目見真吾

錢良字樂山居顧涇岸傳神稱能品其樹石則近浙派
黃鼎字尊古號曠亭又號獨往客家唐市工寫山水邱嶼
雪門人也既而師王侍郎麓臺一變舊蹊嘗言畫品超
逸過於沈着然不沈着不超逸也性好游覽足跡幾半
天下能杖履所歷凡詭奇殊絕之狀一一寄之於筆前
人粉本中所未嘗有也吳門沈宗伯確士嘗云石谷看
盡古今名畫下筆俱有成見尊古看盡九州山水下筆
俱有生氣並稱大家

錢希仲字甫嘉號補菴畫竹師雪坡發竿蒼勁坡石渾厚
鄒元斗字少微號春谷林屋山人贅吾邑大義橋周氏遂
家焉工書善寫花鳥賦色精湛

聖祖南巡獻詩畫於行幄 上善之留南書房行走後任
中書科掌印中書

袁溥字一源號益園工人物花鳥西亭門人其傳神可稱
入室次子椿字大林能繼其學甫壯卒

吳山字南陽號蘊空道人少學畫于徐稔齋後變其法出
入二米房山間氣韻頗秀潤

沈峯字衡山號臥雲工寫人物其畫和合四喜偉幹巨軀
筆致縱放尤所擅長維揚大腹賈不惜重貲購索焉

張景字仲若號雨田馬棲霞門人花鳥渲染有法其寫意
粗枝大葉更爲能事晚游蜀客死

高培字稜原號西疇爲隱湖毛氏輯凡汲古所藏秘本假

得之輒贖錄精好令人不敢手觸蓋深精楷法也又善
畫蘆雁少得乃兄允中指授後超軼更勝

譚嶸字鶴坡號吾亭世居東湖少卽習山水筆氣清佳臨
摹一峯本更善壯事遠游無所遇合後歸里貧老以沒
戴樸字莊士喜畫竹長竿叢篠落筆風生絕似魯得之更
饒縱放性嗜酒自號醉休頭陀跣躡自負不脩邊幅人
以狂生日之

游寓

明

吳偉字小仙江夏人齠時流落至虞錢方伯昕愛其聰慧
俾爲伊子伴讀偉竊弄筆墨畫山水人物之狀方伯見

而奇之曰若欲作畫工耶卽與筆札厚給養之弱冠至金陵遂致盛名云

李流芳字長蘅嘉定孝廉工畫山水嘗語錢宗伯曰精舍輕舟晴窗淨几看孟陽吟詩作畫此吾生平第一快事宗伯笑曰吾卻有二快兼看兄與孟陽耳其風趣如此朱治憫不知何許人通相宅相墓術工金碧山水嘗至半野堂爲作畫冊今邑中尙有流傳者

程嘉燧字孟陽號偈菴自休寧僑居嘉定與錢宗伯友善宗伯築耦耕堂以招之有詩云耦耕舊與幽人約帶月相看共荷鋤畫山水蒼潤渾穆意浮于景

宋珏字比玉莆田人少得程孟陽荔支酒歌行求七年始

遇遂以兄事之時來虞山與錢瞿諸公游爲人豪放書妙八分能詩善畫山水其摹仿一峯老人筆尤傑作也客死吳門歸葬故里十餘年宗伯爲撰墓表屬興化李少文伐石誌之

歸昌世字文休崑山人太僕有光孫善畫竹嘗依錢宗伯爲居停主人子莊字元恭文詞書畫奄有衆長亦工墨竹爲人跌宕激昂酒酣以往旁若無人畫亦不輕以與人

吳拭字去塵新安上山人爲詩清古工畫善琴尤精製墨好游名山水遇通人文士傾囊相贈富人厚價購求輒不與過吾邑遭亂死舟中毛子晉爲收葬西山

國朝

顧原字虎承會稽人善草書畫工浙派長卷巨軸頗見才力愛吾邑山水寓居北城後返故邱而卒

汪痴不知何許人自呼痴丐嘗擔荷二敗籠徒跣行乞條歌俸哭來市上兒童竟投以瓦礫笑受置籠滿則擔至隙地揪若冢然肅拜慟哭之或食以酒食則啓籠出畫具寫蘆雁以答有平沙蕭颯之致嘗題宿雁云月落平沙迴江聲帶夢寒離羣誰復惜哀響落空灘後不知所終或云歛人父本素封來虞少時揮斥盡耳

李櫟字宜中號大拙通州人長身猿臂少會客雲間一等侯張氏後隨父至福山營以善射入行伍爲邑東徐市

市門卒十餘年能作淡墨魚蝦草蟲之屬不求形似自得天趣間畫人物神色飛動迥異俗工索多而無不應款題老叟子不名性嗜茶有桑苧翁癖長齋學佛終老益峯又有劉某白茆汛卒也工寫葡萄菊松鼠曲臻精妙

方外

國朝

釋雪坡住石梅善畫竹寧海令宋培岳月夜看寫竹有詩云澄潭松梵落恰似虎溪灣夜靜雲歸壑談空月在山淨因兼與可竹意亦元關嘯別幾無語超然會入還釋岳字歲堂又號隨山仁和郭氏子初依靈隱後圓具于三峯漢公退隱普寧預告寂能詩工畫山水華滋渾厚

筆底兼收嘗月夜過湖訪西樵王士祿西樵有詩云湖樓敞清夜臥對南屏煙遙思蓮社人已穩堂中禪榻來湖南鐘吹送湖口船剝啄到高枕茶話深周旋涼月映劫波微風吹水口吾師嗣宗鏡久矣祇園賢了悟契懸解妙義空凡詮清風灑蘭雪高懷揖魯連會須謝塵累相就東林邊

釋恆字午月號雲菴三峯大樹法孫住長壽菴嚴持戒律留心儒典既嫻吟咏更善山水楊西亭極推許之其松竹尤佳

釋古字是式其印章曰廊下老僧住東塔寺工寫蘆雁筆致古拙蒼勁得馬雪漁之傳

釋照字大宗又號伊目薙髮方塔寺性聰穎學詩于凌南樓學琴于單曾傳學書畫于顧雪坡俱能得其指授而諸藝中畫竹尤長

閨秀

明

王琛字慧貞長洲王雅宜女適吾邑諸生歸士瑄書肖乃父工白描人物寫大士像尤入神

翁孺安字靜和太常兆隆次女工詩善書尤精畫蘭邑中有翁素蘭之稱

國朝

瞿觀至臨桂伯式耜女適吳江楊藝子一寧工書善畫能

詩詳見吳江志

陳璘字結璘別字曰松曇內史孝廉瞿元錫室待詔煌圖伯姊也工畫山水蒼厚秀拔無女史習胡周薰有詩云莫道李因稱妙手松曇今日畫中禪

吳綃字冰仙又字素公副使許文玉室工吟咏有嘯雪菴集與沈宛君齊名尤善寫生楷法亦佳

吳筠字湘碧諸生衛介臣室工畫山水用墨有法青綠亦佳筆致秀拔不羣受業姚石村

盧璘字鶴鄰工寫花卉經馬樓霞指授矢志不適人嘗以男子服式裝東晚年潛心佛乘寓居壽昌靖中而卒

較書

國朝

文英工山水筆意蒼老嫻吟詠與許貞服倡和平湖陸某贈詩云琉璃研匣鎮隨身芍藥吟成象管新休擬行雲過巫峽玉峯十二自嶙峋

海虞畫苑
略補遺一
卷

海虞畫苑略終

卷一
蘇軾
蘇軾
蘇軾

海虞畫苑略補遺姓氏目

國朝九十五人

卷一

邵逸

歸瑀

嚴楷

華岱

王瀛

程嶠

周之楨

許天牖

劉世楷

陳坤子琛

秦漢

王維寧

陳翼

王漢

譚企進

嚴鴻儀

陳儀

凌竹

程兆麟

余璜

顧天祿

陳道

尹耜

奚崑

陳典

王俊

陳元復

孫淥

陳汝鰲

譚鶴

周璋

盧定

周黃霆

許濤

王恩浦

陳峯

吳觚

岑恩

金思

馮學

吳鏞

顧誠

陸棟

王嶼

盧應張

許行健

潘瓚

翁王瑾

蔣于京

徐誠

王猷

許廷錄

高商隱

陸鯤

劉坤

孫厓

龔克和

薛某

潘林

錢寧

陳熙

沈昂

李立志

項世達

沈陶璋

歸玉立

吳一麟

汪宏

陳金卓

吳標

胡昭

周浦

劉楨

孫從嘉

顧天亨

張謙

姚銓

傅任

顧周瀚

衛潢

高栻

王嘏

陳簡

錢淳

衛萇宏

晏賓

袁泓

余蘅

戴肇先

張翥

殷世安

林維新

席士錡

汪國士

錢秉忠

唐恂

游寓三人

國朝

李國寧

嚴宏

呂梁

方外五人

國朝

釋休

釋治

釋琛

釋岳

釋涵

閨秀九人

國朝

歸湘

王蓀

錢湄

孫氏

汪苻

許玠

項氏

蘇蕙

高素

海虞畫苑略補遺

樗叟魚翼輯

國朝

邵逸字湘民號竹溪性孤潔寄跡多在僧舍能詩善畫山

水

歸瑀字石林副使霽橋叔子為人落落拓人呼為三癡工寫

山水亦落落清雅

嚴楷字端伯文靖公孫善寫蘭竹

華岱字一嶽號九峯善畫花鳥兼能傳神

王瀛字十洲工畫蘭

程喙字禹開工詩善書兼能繪事寫花卉有逸致其畫墨

蘭亦秀勁近松雪一派

周之楨字翰臣號東溪東倉舊族讀書不售從邱嶼雪學畫日摹所藏宋元名跡深得其法與黃尊古居京師數十年性孤介竟不得志而歸

許天鵬字六如號東瀾攻詩嗜畫一邱一壑甚有法度惜不多作傳者絕少

劉世楷號雪崖居李市工山水邱嶼雪門人

陳坤字載安工畫人物花鳥尤善傳神子琛字獻其能承家學寫縮本翎毛花木蟲介尤勝

秦漢字淮夏號二水居北郊善畫花鳥

王維寧字古臣居邑東韓莊又號寒溪子好遊山水而又

善畫所至輒圖其勝以歸嘗與友人結西湖看花社歲必一往計一生凡二十七度云年七十營生曠時歌嘯其間又作詩傲淵明自祭人稱其達

陳翼字友石通琴書兼善寫生康熙初挾其技以遊京師時張御史學禮出使琉球邀與偕往嘗授琴於其王世子既還京師未幾死於逆旅

王漢字文筠號萼洲餘姚令曰俞次子中丙午舉人工畫蘭後任溧陽教諭卒於官

譚企進邑諸生工山水花鳥

陳儀字令瞻居何市喜作畫其草蟲尤勝性嗜茶每于臭味品別地道如建溪龍井天池廟後之類纖悉不爽嘗

遊虎邱僧亦善品茶聞陳名因取二種片析其半共瀹
試陳曰此種余未之識其味當在某某間僧爲俯服亟
稍鴻漸復生云

凌竹字南樓號此君工詩善書而畫不多作故人無知者
程兆麟居何市善畫竹亦工吟詠

余璜字渭微珣弟工寫生人物亦勝

顧天祿字松年工畫蘭竹

陳道字我菴居西楊村教授生徒能詩善畫

尹耜字耕野號介邱山人單寒績學嘗斷炊僵臥不受人
憐從里中陳南浦吳漁山王石谷輩遊既能詩復善書
兼精圖繪年僅三十六而卒顧雪坡有詩哭之人言君

死盡興悲在昔淒涼我獨知抱病七旬堂上母啼飢六

月襟中兒雨淋螭篆荒苔壁風折烏棲舊樹枝惆悵無

端成未別一牋空剩落梅花

君之絕筆也

又凌南樓題畫冊

云介邱尹子能詩客餘力兼于繪事工今日披圖人不

見精靈應在釣船中

奚岷字山輝居何市工花鳥翎毛

陳典字玉先居歸市善畫水墨牡丹生一女能詩其徒張
數畫亦善可亂真

王俊字晉公山水學耕煙得其形似偃蹇不偶年逾七十
食貧而卒

陳元復字西林世居西楊村工山水有邱嶼雪遺意或云

得漁山指授

孫綠字互清邑諸生大同知府魯之孫善寫花卉筆氣俊
玉雅多以指頭戲作而筆畫甚少人故目爲草率居燕日
久里中竟無有知其名者

陳汝熬初名繹字无逸邑諸生善畫竹亦工寫生得馬棲
霞之傳一枝片葉秀潤有致惜享年不永

譚鶴字雲路寫山水學邱嶼雪無濃重俗氣而清秀可觀
周璋字瑤賓又號玉京道人能畫山水嘗繪西郊北麓二
長卷爲時所稱

盧定字觀揚號寧齋長身美鬚髯遊武林遂補仁和諸生
書學董文敏兼精繪事山水花鳥並稱秀潤

周黃霆字集山號墨公愷之弟邑諸生工詩寫生點染在
有意無意間

許濤字巨源號藕村家五渠工詩書喜作小楷極秀整點
染花鳥似其從兄在野

王恩浦字涓陽副使舜漁後徙居邑東黃沙港因號海濱
逋客工詩善書少從馮簡緣游得其指授又精篆刻畫
竹師顧雪坡亦蒼勁有則

陳峯字三石居何市工寫蘭又善畫兔

吳舫字蘅臯書學趙松雪又喜作山水

岑恩字玉方以畫竹受知於蔣文肅

金思字東阿能畫花卉晚歲佞佛直如老僧

馮學字悅之居芝川畫山水人物又能傳神不用質粉純以脂兼赭色渲染無不形肖

吳鏞字文藻居恬莊爲人孤介愛畫山水頗自矜貴

顧誠字以瞻自號二癡山人工寫花鳥人物天資疎曠筆亦雄健性嗜酒畫具與壺觴雜陳間有俗子求繪事輒以酒和色寫之或詢之曰余畫豈宜落僉父手耶俾易腐敗也

陸棟字雲松畫仙佛得丹山指授傳神尤妙時北平史容蒼以少參督漕四郡棟默寫其照呈之丰儀宛然

王嶼字三谷少從邱嶼雪遂授以畫法亦能詩頗有清致年八十二而卒

盧應張字二徵善花鳥

許行健字政夫號白邨司成石門孫少卽以詩文名嘗居西郊故園與楊西亭比鄰交好因學作畫片枝單葉頗有逸趣壯遊四方晚歸舊里鍵關讀書唯以詠歌爲事與王西澗汪茶圃輩唱和无虛日云

潘瓚字載岳工山水人物長于射獵圖

翁王瑾字亦懷侯官人九歲而孤依外家翁氏因蒙翁姓外王父官京師值耿逆亂寄孀常熟瑾遂家焉王話山愛其淳謹妻以女話山故善山水瑾得其傳後復經蔡天涯指授而學益進又善篆刻

蔣于京字敏士能琴善書喜作水墨梅竹

徐誠字大成太倉人徙居芝塘里隱其姓易徐爲余工花鳥得其鄉吳慎修淑所傳

王猷字雪舟詩人德操孫德操與毛子晉友善遂自郡遷吾廬北郊猷修髯玉立彬彬儒雅頗善寫生

許廷錄字升聞號適齋與馮簡緣爲忘年交講求字學詩律兼工填詞撰五虎由兩鐘情諸傳奇又時畫竹以寄

興頗近雪坡

高商隱畫山水耕煙門人

陸鯤字天池臨安令穉懷孫少孤貧依族祖某適有喪在殯鯤就惟燈夜讀達旦工帖括屢試輒蹶遂習畫能傳神雨亭蔣公歿于王事欲寫照無有能者鯤默貌之儀

容儼然

劉坤字大田繪事師楊西亭早卒

孫厓字象畫受業西亭工人物頗以界某見長又善琴畫聖祖南巡召至不行幄命之鼓琴作畫名遂著

龔克和字西麓工畫山水

薛某字周翰號松厓居湖田畫得馬棲霞指授入都供奉養心殿病瘵告歸旋卒

潘林字衡谷號西疇花卉翎毛師馬棲霞蔣文肅招置幕下凡進御花鳥卷冊多出其手

錢寧字原裕與馬棲霞爲忘年交遂善畫後又從楊西亭指授鉤染賦色遞傳得法

陳熙字文縉工繪人物亦善傳神

沈昂字千里號蒙村善畫馬亞於徐鐵山

李立志字安禮善畫竹

項世達字孝揚善畫蘆雁

沈陶璋字君牧號拭之山水私淑耕煙唐石耕亟稱之

歸玉立字二亭工花鳥好遠遊客死西華縣署

吳一麟字聖徵畫花鳥傳自馬棲霞

汪宏字道可山水師蔡天涯

陳金卓字壽安花卉翎毛悉工馬棲霞弟子

胡昭字企南從楊西亭學畫偕遊京歸里尋卒

周浦字滄漁工人物山水

劉楨字宸翰西亭弟子筆力蒼秀惜早夭

孫從嘉字燕式號雪厓從許在野游花卉勁拔絕不類其

師

顧天璽字仲英山水筆致超脫西亭極口激賞甫壯而卒

未竟其學咸惋惜之

張謹字益士號臥雲道人讀書汲古詩多警句家芝川東

江村地僻罕與世接人無知者吟詠餘閒寫墨竹極蕭

疏之致

姚銓字鶚升號蓮溪構思敏巧能以絹素摺作人物鳥獸

極佳嘗從江白沙畫竹間寫花卉又工篆刻

傅任字宏可江西人父晉公善堪輿愛吾虞山水徙家焉

任嫻吟詠善寫生

顧周瀚字萬琳號北涯邑諸生居吳市幼撫從父雪坡小竹後又師楊西亭山水花鳥俱能得其大意
衛潢字源長號星涯能畫花鳥人物惜早天
高棡字允中居虹涇工畫蘆雁其蒼老少遜其弟而秀發過之

王暇字次霞太倉人少贅唐市蘇氏遂家焉工寫山水人物嗜飲醉後逞筆尤英英饒致

陳簡字奕善花鳥人物

錢淳字勝文東湖之後工畫花鳥長於鈎染余荆山門人衛萇宏字天槎御史浩之後中雍正己酉舉人書課餘力

愛畫水墨花卉

晏賓字于王居何市工傳神

袁泓字佳谷號雪廬居廟巷善寫墨竹

余蘅字芳洲號藥亭工畫花鳥私淑其叔荆山長於潑墨寫意或醉後放筆尤縱逸有神

戴肇先字伯昌畫蘭得二趙標格

張翥字運南號北林家梅李山水師吳南陽雍正壬子秋颶風為災海水泛溢居民死者相枕籍太守周公欲繪入告遂屬運南頗加禮敬運南性故跣躄不以軒冕為意周公曰為莽畫師

殷世安字濟公工詩寫墨竹有煙霏露滴之致

林維新字周公畫山水蔡天涯弟子

席士錡字湘北號芝房邑庠生循例入太學性聰穎少而嗜畫當其興之所極吮毫潑墨淋漓澹蕩天趣自然會于長夏畫山水樹石數十幀每成一幀輒題小詩其上徧貽弟兄戚友忽无疾遽卒年逾強仕士林惜之

汪國士字芋堂號筠軒翰撰東山子由諸生入太學文學餘閒揮灑花卉得幽逸之致

錢秉忠字愷君號大川邑諸生南樂令春明孫居周涇口耕讀自好能畫墨竹蘭

唐恂字慤如號松門花卉得纖濃之態後游湖南德安府幕歸溺死蕪湖道中

游寓

國朝

李國寧字與公休寧人善寫泥金人物及大士像隨其父貞來虞貞又工蠅頭小楷書華嚴經塔圖與許成如友善後卒成如擇地葬之北山

嚴宏字公偉餘姚人官總戎喬遷我虞極聲伎之樂喜畫山水近董文敏一派後復購郡中辟疆園以居

呂梁字學鴻號秋巖長洲人從虎邱陳必大學畫少失怙恃來虞依舅氏以居性敏一見輒能復與白村諸君輩游又學詩年三十二而卒

方外

國朝

釋休字東脩俗姓呂氏出家智林寺梅園時從石林源公游禪誦之餘兼通書史間畫山水亦楚楚俊拔

釋冶字雪爐邑陳氏子年十九薙髮于三峯檠菴歷住揚州華山黃山後還里住持白雀寺勤課焚脩復遊心繪事

釋琛字天則少爲雲間諸生受法費隱繼住維摩能詩畫孤潔有品

釋岳字邃岳住持白雀寺清修自好嘗繪水墨布袋羅漢像

釋涵字鑒清姓蔡氏出家桑林菴後主智林席善畫竹規

撫雪坡年四十餘而示寂

閩秀

國朝

歸湘字溶溶霽橋孫女王友商之室工山水花鳥

王蓀號琴言居士吳縣人薛熙副室熙嘗寓居郡中朱園日與士人論文唱詠戶屢充塞蓀克主中饋治具無倦善畫墨竹

錢湄後更名珏字雙玉受業楊西亭畫花鳥性好遊覽歸太倉貢生沈某詩篇畫筆唱酬偕老

孫氏什加令麗公女幼習畫扶風適北平史氏時少參容菴公督漕四郡也

海虞畫苑略補遺
汪苻字行芳許白村繼室長于花鳥頗得沒骨法雅飭幽
豔極有丰神

許玠字非玉適張麗中能花鳥

項氏孝揚女小字俊性端淑父工蘆雁氏亦幼嫻兼能辭
翰適非配偶旋寡無子依其夫族氏毀棄文玩蓬首垢
面雜羣婢操作無怨色聞者哀之

蘇蕙字婉香西田孫女愛畫秋蟲病蝶得蕭颯疎瘦之致
甫笄適某旋療疾卒

高素字允潔江揆庭之室少從兄穉原學畫蘆雁亦能詩

海虞畫苑略補遺終

